



**COMITÊ
ORIENTADOR 25**

JUVENTUDE E LUTA, A ESPERANÇA DO POVO

REVISTA HISTÓRIA DA RESISTÊNCIA



EDISAUN I
Janeiro - Junho 2019

REVISTA HISTÓRIA DA RESISTÊNCIA

EDISAUN I

JANEIRU 2019

Revista História da Resistência
Comité Orientador 25 (CO25)

Imajen Kapa : Kreditu AMRT
Kapa no Ordenamentu: Domingos da C. F. Cardoso

Konsellu Editór: Órgaun Diretivu CO25

Editór Tékniku:

- 1. Eugénia U. C. Correia**
- 2. Antero Benedito da Silva**

Edisaun I, Janeiro 2019

Publikasaun husi CO25

ISSN:-

Direitu Rezervadu:

© Comité Orientador 25, Janeiro 2019

PREFÁSIU



Comité Orientador 25 (CO25), estabelese bazeia ba Resolução do Governo n.º1/2017, 09 de Janeiro de 2017. Lansamentu CO25 iha loron selebrasaun Tinan 25 Masakre Sta. Cruz 1991-2016. Mandatu CO25 mak peskiza no hakerek livru kona-ba Luta Frente Urbana, frente klandestina partikulár-liu envolvimentu foin-sa'e no estudante sira nian iha Luta Libertasaun Nasionál Povu Maubere.

Organizasaun klandestina balun envolve ona iha CO25, no UNETIM (União Nacional dos Estudantes Timores)/OPJT (Organização Popular da Juventude Timorense) sei envolve iha futuro ho objetivu atu hakerek livru ba história orál kontribuisaun foin-sa'e no estudante-sira iha Luta ba Libertasaun Nasionál. Konta história orál, laos deit hateten sai faktu-sira, maibé mos fo oportunidade ba autór-sira inklui husi baze, ka Maubere no Buibere oan-sira, hodi konta, apresia, no aprende husi sira-nia história rasik. História laos deit, atu halibur faktu, no sai instrumentu ba reflesaun, maibé mos tenki interpreta iha asaun konkreta hodi kontribui ba Luta Libertasaun ita-nia povu nian. História orál tanba ne'e, laos deit kona-ba pasadu, maibé presente no futuro. Líder Nasionál Roque Rodrigues haktuir: "*quem não conhece o passado, não pode andar seguro no futuro,*" katak sé mak la koñese ninia pasadu nia labele la'o ho seguru iha futuro.

CO25 mos hetan orientasaun husi lideransa-sira, atu la foku deit ba juventude ninia kontribuisaun iha Luta ba Libertasaun Nasionál, maibé mos haree ba ema hotu ninia kontribuisaun. Maske nune'e, ai-knanoik haktuir katak, atu ita bele la'o ba dook, ita tenki hahú ho hakat ida. Ita tenki hahú ho halibur dadus, debate, analiza no hakerek história foin-sa'e-sira, hodi bele aprende halo servisu seluk mak boot-liu. Ida ne'e, CO25 konsidera estratéjiku, dignu no seguru.

Revista História da Resistência nudar iniciativa Comité Orientador 25 nian, publika regularmente, hakerek narrativa, memória no artigu sientífiku sira iha área história, sei sai dalan ida atu promove mos siénsia no formasaun rekursu-umanu-sira iha área história.

Iha Edisaun ida ne'e publika transkrisaun orál perfil Organizausaun Juventude Rezisténsia nudar Frente Política tantu iha Zona Okupada-sira¹, iha territóriu Indonéziu nomos iha rai seluk.

Ikus liu, CO25 konvida sidadaun tomak atu bele kontribui no partisipa iha peskiza CO25 nian liuhusi informasaun ka dadus sira ne'ebé maka ita boot sira domina, atu nune'e ita bele hariku no hatur história iha fatin lolos.

Comité Orientador 25 hato'o Saudasoens Kordiais ba Leitór-sira hotu iha ne'ebé deit!



Constância da Conceição Pinto "TERUS"

Antigu Sekretáriu Comité Ezekutivu FRETILIN/CNRM-Frente Klandestina

Prezidente Comité Orientador 25

Janeiru 2019

¹ Zona Okupada: hakarak refere ba asaun-sira Frente Klandestina nian.

Konteúdu

PREFÁSIU.....	3
REVISTA HISTÓRIA DA RESISTÊNCIA	7
INTRODUSAUN	8
KRIASAUN CO25	8
VIZAUN NO MISAUN CO25	9
NOTA FINÁL	9
HISTÓRIA ORÁL: HALIBUR FAKTU LIU-HUSI INTERVISTA, NO REFLESAUN BA FAKTU	10
PERFIL EMBRIONÁRIO DA OJECTIL ATÉ A FORMAÇÃO OU SEJA, A CONSTITUIÇÃO DA BRIGADA NEGRA.....	13
ESTUDAR LUTANDO, LUTAR ESTUDANDO	13
A NATUREZA E A EVOLUÇÃO DO OJECTIL E FECLITIL	14
O BIRÔ ESPECIAL E A BRIGADA NEGRA (BN).....	16
O NASCIMENTO DAS BRITAS.....	17
NOTAS FINAIS	17
RENETIL-RESISTÊNCIA NACIONAL DOS ESTUDANTES DE TIMOR-LESTE.....	18
BRUTALIDADE MILITAR.....	18
RENETIL: NATUREZA NO NINIA EVOLUSAUN ESTRUTURA	18
PAPÉL NO PRINSÍPIU	20
INDONÉZIASAUN NO INTERNASIONALIZASAUN	20
RENETIL HO NINIA ASAUN.....	22
NOTA FINÁL	23
DEWAN SOLIDARITAS MAHASISWA TIMOR-TIMUR (DSMTT) TRANSFORMA KAMPUS UNTIM BA KAMPUS LUTA NIAN IHA 1998 – 1999	23
TRANSFORMASAUN UNTIM BA “KAMPUS PERJUANGAN”	23
ESTABELESIMENTSU DSMTT.....	24
JANELA OPORTUNIDADE HUSI REFORMASAUN IHA INDONÉZIA	25
ESTRUTURA DSMTT I (1998-2000).....	26
PALKU LIVRE NO DIÁLOGU REKONSILIASAUN IHA NASIONÁL	26
DIÁLOGU ABERTU IHA NIVEL DISTRITÁL.....	27
DSMTT NIA PARTISIPASAUN NÍVEL NASIONÁL-INTERNASIONÁL	28
PREZENZA UNAMET IHA TIMOR-LESTE	28
KONSULTA POPULÁR 30 AGOSTU 1999.....	29
NOTA FINÁL	29
MÍDIA MAINSTREAM ESTADUS UNIDUS AMÉRIKA IHA TRAJEDIA TIMOR 1975-1999.....	30
EZEKUSAUN JORNALISTA NAIN 6 HO TRISAUN MÍDIA	31
REPORTAZEN FALSU NO KORRETU	33

REPORTAZEN KONABA SUHARTO: JENOSIDISTA DIAK NO AT	34
NOTA FINÁL	35
BIBLIOGRAFIA	36
HISTÓRIA NO NASAUN: DEKOLONIZA HISTÓRIA TIMOR	37
DIFUSIONISMU NO KANÁL HISTÓRIA TIMOR NIAN.....	38
HISTÓRIA TIMORIANA NO LIAN PORTUGÉS: IDENTIDADE NASAUN SAIDA?	41
FONTE HISTÓRIA ORÁL NO LIAN EMA-LISAN: FORMA NO ATUALIDADE ..	43
KONKLUZAUN.....	47
LEITURA TUIR MAI:.....	48
DOKUMENTU TRABALLU	49
SUBSÍDIU OPINIAUN BA HAKEREK HISTÓRIA LUTA JUVENTUDE NO ESTUDANTE NIAN	49
SUJESTAUN NO PLANU IMPLEMENTASAUN	50
RATE LAEK, F. (2018). <i>FALUR NIA SEMO: MEMORIAS HUSI FALUR RATE LAEK. TIMOR-LESTE: DOMINGOS RAÚL</i>.....	56
REVIZAUN	56
SIMU SUBMISAUN ARTIGU	58

REVISTA HISTÓRIA DA RESISTÊNCIA

KRÓNKA

BEMVINDU TINAN 2019

Husi Antero Benedito da Silva

Editór

Frederic Durand, Geoffrey Gunn, mak entre istoriador kontemporánu ne'ebé hakerek ona livru história Timor-nian balun. Revista ne'ebé partikulár-liu dedika ba História Orál ne'ebé ejiste iha Timor-Leste, maske nune'e, mak úniku publikasaun ida ne'e. Comité Orientador 25 (CO25) sei publika edisaun rua kada tinan, durante tinan hat mai oin 2019-2022. Edisaun I Revista História da Resistência sei foku primariamente ba perfíl badak Organizasaun Masa Rezisténsia nian tolu mak OJECTIL (Organização Juvenil dos Estudantes Católicos de Timor-Leste), RENETIL (Resistência Nacional dos Estudantes de Timor-Leste) no DSMTT (Dewan Solidaritas Mahasiswa Timor-Timur). Líder no membru prinsipál sira balun husi kada organizasaun mak hakerek, liu-husi prosesu konsulta no debate naruk, no kria perfíl hirak ne'e, sai interesante tebes ba leitór-sira partikulár-liu jersaun foun Repúblika Demokrátika Timor-Leste (RDTL) nian. Ida ne'e signífika Revista História da Resistência kria ona espasu ba autór-sira hodi konta no hakerek rasik sira nia envolvimentu ba públiku. Edisaun ida ne'e inklui mos artigu sientífiku badak, ne'ebé sei mos karakteriza edisaun hirak tuir mai.

Introdusaun

Eugénia Uránia da Costa Correia

Konstituisaun Repúblika Demokrátika Timor-Leste (RDTL) kontinua valoriza rezisténsia ne'ebé maka halo husi Povu Maubere no konsidera mos kontribuisaun luta husi ema hotu ba Libertasaun Independénsia Nasionál. Hanoin hikas importánsia história Timor-Leste ba luta Libertasaun Nasionál, tenke kria arkivu dokumentasaun no hakerek hodi fo motivasaun polítika, filosófiku no sientífiku ba jersaun foun. Konsidera katak Juventude Maubere husi tempu antes no hafoin Proklamasan Unilaterál Independénsia iha loron 28 Novembru 1975, prátika ho forma ne'ebé iha konkordánsia, organizadu no la lakon konsiderasaun ba papél husi segmentu hotu-hotu iha sociedade nudar ajente determinante iha luta ba Libertasaun Nasionál.

Luta ba Libertasaun Nasionál, inspira no transmite valor no hanoin husi beiala sai nudar karakter Timor-oan nia nasionalismu povu oprimidu, haforsa patriotismu nudar fatór ne'ebé Timor-oan sira hotu presiza hodi sustenta Timor nia luta ho rekursu ne'ebé kiik maibé bele hakat liu momentu ne'ebé susar. Husi inisiativa ida ne'e, VI Governu RDTL Konstitusionál kontinua prodúz no promove organizaasaun sira ne'ebé maka hola parte no partisipa ativamente iha prosesu luta ba Libertasaun Nasionál liu-husi atu rekolla dados no informaasaun istóriku liuhusi organizaasaun rezisténsia hirak ne'ebé maka partisipa iha luta ba ukun-rasik-an,

no sei halibur iha livru konjuntu ida no artigu sientífiku sira.

Kriasaun CO25

CO25 hanesan kriasaun Governu Repúblika Demokrátika Timor-Leste (RDTL) iha VI Governu nian no legalmente husi Resolução do Governo n.º1/2017, 09 de Janeiro de 2017. Oficialmente lansa CO25 ba públiku iha tinan komemorasaun dala 25 Masakre Santa Cruz, iha loron 12 Novembru 2016. Lansamentu ne'e prezide husi Prezidente Repúblika Sr. Taur Matan Ruak. No iha loron 18 Juñu 2017 hetan Tomada de Posse husi Comandante em Chefe Sr. Kayrala Xanana Gusmão. CO25 kompostu husi organizaasaun rezisténsia no entidade nasional ne'ebé maka hola parte ativamente iha luta ba Libertasaun Nasionál. CO25 kompostu husi ema nain 26 ne'ebé maka mai husi organizaasaun rezisténsia-sira nomos balun hanesan membru onoráriu. Organizaasaun rezisténsia sira ne'e maka hanesan; Comité Executivo, ORGÃO 8, OJECTIL (Organização Juvenil dos Estudantes Católicos de Timor-Leste), OJETIL (Organização da Juventude e dos Estudantes de Timor-Leste), HPPMAI (Himpunan Pemuda-Pemudi dan Mahasiswa Anti Indonesia), SAGRADA FAMILIA, OPJLATIL (Organização Popular da Juventude Loriku Aswain de Timor-Leste), PJLA (Prezidium Juventude Loriku Aswain), DPP IMPETTU (Dewan Pimpinan Pusat Ikatan Mahasiswa dan Pelajar Timor-Timur), AST (Associação Socialista Timorese), RENETIL

(Resistência Nacional dos Estudantes de Timor-Leste), FITUN (Frente Iha Timor Unidade Nafatin), DSMTT (Dewan Solidaritas Mahasiswa Timor-Timur), OSKTL (Organizasaun Solidaridade Klosan Timor-Leste), UJTL (União da Juventude de Timor-Leste) no CNJTL (Conselho Nacional de Juventude Timorenses).

Estrutura husi CO25 maka iha Assembleia Jerál, Órgaun Diretiva, Órgaun Ezekutiva no Unidade Peskiza. Sira nain 26 ne'ebé maka hamutuk iha CO25 hanesan; Constâncio da Conceição Pinto "Terus", Jacinto Alves, Gregorio Saldanha "Mouris", Avelino M. C. da Silva "Shalar Kosi", Antero Benedito da Silva 'W-Moris', Maria Dadí Soares Magno, José M. Fernandes "Nakfilak", Vasco da Gama "Criado", Aleixo Gama "Cobra", Julião Mausiri "Metan Zebra", Andre da Costa Belo "L4", Fausto F. da Silva "Liurai Tasi", António Ai-Tahan Matak, Mariano Assanami Sabino, Jorge Serrano, António M. Lopes "Fatuk Mutin", José A.M.X. "Siak", Elizário Ferreira, Moisés da Silva, Octávio da Conceição, Filipus Pereira, José Lobato Gonçalves, Catarina Ximenes "Bimalik", Maria Angelina Sarmiento, Arsénio Pereira "Lavera" da Silva no Leovigildo Hornai.

Estabelesimentu CO25 hatudu dever morál husi parte governu atu valoriza partisipasaun organizasaun juvenil no estudantil ba luta Libertasaun Nasionál, ho nune'e bele hametin espíritu nasionalismu povu oprimidu no motiva foin-sa'e no jersaun foun sira liuhusi aprende história rezisténsia ba luta Libertasaun Nasionál husi

livru história ne'ebé sei prodúz husi CO25.

Vizaun no Misaun CO25

CO25 ninia vizaun maka; Publikasaun Livru História Rezisténsia Organizasaun Juvenil no Estudantil iha Luta Libertasaun Nasionál. Hodi atinji vizaun refere CO25 sei halao ninia papél ne'ebé maka mensiona iha misaun ba tinan 5 nian hanesan;

- Rekolla no kompila dados istóricu ne'ebé permite rekonstrui papél organizasaun juventude iha luta Libertasaun Nasionál.
- Hakerek no analiza dados istóricu konaba papél juventude nian iha luta ba Libertasaun Nasionál.
- Prodús Livru História Rezisténsia Organizasaun Juvenil no Estudantil iha Luta ba Libertasaun Nasionál.
- Arkivu no Prezervasaun dokumentu no memória ne'ebé relasaun ho História.

Nota Final

Timor-Leste iha faze ikus Libertasaun Pátria iha frente tolu ne'ebé sai hanesan estrategia funu no luta hasoru invazaun ka kolonialista-sira. Frente tolu ne'e mak hanesan; Frente Armada (FALINTIL), Frente Klandestina no Frente Diplomátika. CO25 estabelese atu bele foku liuba envolvimentu no partisipasaun juventude iha Frente Urbana (Frente Klandestina) iha Luta ba Libertasaun Nasionál.

Konsidera katak Konstituisaun RDTL (Repúblika Demokrátika Timor-Leste) rekoñese no fo valorizasaun ba rezisténsia sekulár ba Povu Maubere kontra dominasaun estranjeira hodi hetan Independénsia Nasionál. Asaun husi parte Frente Klandestina ne'ebé envolve ema barak mak sakrifika sira-nia vida ka moris inklui labarik, feto no espesialmente juventude-sira ne'ebé sai kauza ba konsekuensia hodi hetan Liberdade. Tanba ne'e importante tebes atu hakerek História kona ba Luta Libertasaun Nasionál.

Ejiste ona mos ekipa peskiza ida, ne'ebé konstitui husi Timor-oan sira, ne'ebé hahú dadaun ona halibur dadus liu-husi revizaun ba literatura no analiza kontekstu, iha tempu badak nia laran sei realiza entrevista ho autór-sira inklui membru babain sira nia envolvimentu iha organizasaun foin-sa'e sira. Tanba ne'e CO25 apela ba partisipasaun públiku ba asuntu refere.

História Orál: Halibur Faktu Liu-husi Entrevista, no Reflesaun ba Faktu

Antero Benedito da Silva

Hori-uluk-liu bei-ala sira hakiak tradisaun história orál, konta husi ibun ba ibun ka hato'o liu-husi poemas, ai-knanoik, lejenda, ne'ebé hamosu 'interasaun sosiál', ne'ebé tuir fisikólogo Russo Vigotsky sai instrumentu ba prezerva sira-nia matenek. Pelumenos tinan atus ida ikus mak istoriador sira adopta

medida sientífiku-sira, hodi prodúz dokumentu eskrita sira, hodi oferese prova kona-ba saida mak akontese iha tempu uluk. Ho progresu teknolojia, história hetan lejítimasaun atu reproduz nia-an. Nune'e métodu atu hetan história orál, uluk-liu mak entrevista, maibé peskizador-sira halo mos *recording* no arkiva, dijitaliza história orál. Referénsia ba tekstu ida ne'e mai husi fontes oioin, inklui manuál ba história orál, hodi simplesmente hato'o informasaun ruma mak, talvez sei tulun istoriador orál sira iha ne'ebé deit.

Atu kontinua, ita husu: saida los mak história orál? Staughton Lynd argumenta katak história orál mak história ne'e rasik, "nudar forma artikulasaun konsiénsia ema nian". História Orál sai instrumentu importante ida ba peskiza kona-ba história. Péritu Universidade Oxford nian Paul Thompson 1998 argumenta:

"... oral history certainly can be a means for transforming both the content and the purpose of history. It can be used to change the focus of history itself, and open up new areas of inquiry. It can break down barriers between teachers and students, between generations, between education institutions, and the world outside. And in the writing of history, whether in books, or museums, or radio and film, it can give back to the people, who made and experienced history, through their own words, a central place."

Tradusaun: "História orál klaramente bele sai instrumentu ba

transforma kontekstu no intensaun história nian. Bele uza história orál hodi muda foku história nian, no loke área foun ba investigasaun. Nia bele harahun bareiras entre mestre no estudante sira, entre jerasaun, entre instituisaun no ho públuku. Iha hakerek história, tantu iha livru, iha muzeu, ka rádiu no filme, bele fo-fila ba povu, ne'ebé mak halo no esperiénsia história, liu-husi sira nia liafuan rasik, nudar sentru (Thompson 1998, p.22).”

Autór seluk, Robertson, reklama ho hanoin hanesan. Nia dehan katak história orál laos deit envolve prosesu dokumentasaun ba informaun ne'ebé mak hetan husi



Peskizador Rekolla informaun liuhusi entrevista

partisipante-sira liu-husi entrevista, maibé mos dokumenta no rekoñese knar importante ne'ebé ema babain nian iha história. Istoriador orál Australiana Janis Wilton, husi University of New England, espresa simplesmente katak ‘fo-hikas fali história ba povu’, mak objetivu uzu história orál. Liu-husi história orál mos comunidade sei hetan auto-konfiansa hodi hola inisiativa no hakerek rasik sira-nia história, bainhira sira bele. Ai-knanok

Afrikana haktuir: “Bainhira animal sira la-iha sira nia istoriador rasik, história sei sempre afavor kasador-sira .”

Ba sira ne'ebé hakerek história ka istoriador, nudar ema mak simpátiku ba povu oprimidu sira, sira nia knar laos simplesmente celebra história ho povu oprimidu maibé hamosu povu nia konsiénsia, atu hatene sira nia knar iha história, iha sosiedade ohin loron no ba futuro.” Tanba ne'e história, laos atu konta deit, maibé história mos poténsia ba hamosu asaun, hodi luta ba libertasaun mak lolos povu oprimidu nian. Thompson dala ida tan história, laos atu konfirma, ka kopta ba mundu estabesidu maibé história tenki muda mundu. Da Silva iha ninia hakerek kona-ba edukasaun populár FRETILIN nian tinan 1974-1978, argumenta katak história orál ninia objetivu mak ‘re-konsiéntiza Povu Timor, rekopera no re-artikula sira nia konsiénsia, ne'ebé sira dezenvolve ona entre tinan 1974-1978, ba sira nia liberdade husi dominu eksterna no buka alternativa oioin ho imajinasaun hodi liberta sira nia-an rasik, iha sira nia rain.

Buat balun ne'ebé peskizador-sira presiza hatene;

- Tanbasá mak realiza peskiza história orál?
- História orál ne'e atu ba sé (família, públuku, nsst)?
- Oinsá mak uza história orál ne'e (essay, projetu peskiza, presentasaun vizuál ka verbál, presentasaun computador)?
- Forma aprovasaun (akordu

verbál ka hakerek)?

- Sei realiza entrevista iha ne'ebé (e.z. iha informante ninia uma, iha fatin nakloke ruma, iha eskola, nsst)?
- Kestaun ospitalidade (titúlu refere-ba ema mak los, no protokolu seluk, sensibilidade ba aihan, benvindu no fahe-malu)?
- Uza instrumentu hira hodi entrevista (tape recorder, hakerek nota, video recording)?
- Oinsá mak informante-sira hanoin ka hakarak transkrisaun finál (iha lingua orijínál ka iha formatu tradusaun)?
- Bainhira mak sei uza informasaun-sira (tinan ida ne'e, ka tinan hirak mai)?
- Informante-sira sei hetan asesu ba kópia finál rezultadu estudu?
- Entrevista: Lokalidade, fonte informasaun seluk, kontaktu mak lao daudaun, avaliasaun, prosesa data entrevista nian, transkripsaun, no rekoñesementu ne'ebé los, ba ema hotu mak kontribui?

Peskizador-sira presiza halo kontaktu preliminaríu ho informante-sira, hodi asegura katak sira preparadu atu simu entrevista. Vizita preliminar nudar instrumentu ida hodi hatene sira nia lokalidade, hatene pesoál informante ho ninia família-sira, no sei realiza entrevista iha ne'ebé. Konversa informál sira, bele hafanu memória informante-sira, hodi kria relasaun ida ne'ebé

nakonu ho konfiansa antes realiza entrevista história orál. Peskizador-sira mos presiza esplika ba informante-sira, etika peskiza ne'ebé sira tenki asina no tanbasá. Informante-sira mos presiza hatene, informasaun hirak ne'e sei uza ba saida, bainhira no sé iha informasaun ruma ne'ebé sira sei la admite atu hato'o ba públiku ka uza ba objetivu entrevista nian. Ida ne'e importante, tanba povu, informante mak nain ba história orál.



Istória Orál envolve dada lia informál no amizade

Bainhira peskizador-sira realiza ona entrevista ho ema balun, sai nesiedade ida iha prosesu aprende, peskizador-sira tenki avalia prosesu hotu durante período entrevista. Peskizador-sira tenta haree fali, pergunta-sira ne'ebé sira uza, no karik sira hetan pergunta foun ruma ne'ebé presiza aumentan, oinsá reasaun informante-sira ba pergunta-sira durante entrevista, sira nia família ninia resposta, no sé sistema recording buat hotu lao los. Peskizador-sira tenki aprende oinsá mak kuida informasaun-sira no ekstra-kuidadu ba prosesu hotu durante entrevista, hodi prevene erru ruma ne'ebé fatal. Uza pergunta-sira ne'ebé bele tulun informante-sira, hodi konta sira nia história, sai nesiedade. Laos ema hotu mak iha

talentu ba halo entrevista, maibé ema hotu iha poténsia atu aprende. Ema dehan história orál, labele konta faktu ho mar-maran deit, tenki envolve prosesu ida ne'ebé, tulun informante-sira re-lembra no hetan reflesaun ruma mak klean husi faktu sira. Maibé presiza atensaun katak reflesaun sira laos faktu maibé, komprensaun ruma mak konstrui husi faktu-sira kona-ba realidade uluk nian.

Referénsia:

Da Silva, A.B (2012), Understanding Popular Education of FRETILIN 1973-1978, Tese ida submete ba University of New England, Australia.

Thompson, P (1988), The Voice of the past, The Oral History Reader (2nd ed. ed., pp. 21-28). New York: Routledge.

Oral Histories (2007), Source: https://www.qcaa.qld.edu.au/downloads/approach2/indigenous_g006_0712.pdf

Andrea L'Hommedieu (2008), Manual, Source: <https://library.bowdoin.edu/arch/george-j-mitchell/oral-history/OralHistoryManual%20Mitchell%202011May.pdf>.

Hunner, Jon et al (anonym), Preserving Community/Cuentos del Varrio An Oral History Instruction Manual Source: <http://history.nmsu.edu/files/2014/10/Oral-History-Manual.pdf>

PERFIL EMBRIONÁRIO DA OJECTIL ATÉ A FORMAÇÃO OU SEJA, A CONSTITUIÇÃO DA BRIGADA NEGRA

Autór: Diresaun OJECTIL

Estudar Lutando, Lutar

Estudando

A Luta pela Libertação foi coletiva e surgiu duma consciência objetiva. A forte liderança que então existia nas bases de apoio, posteriormente dirigida pelo irmão Xanana Gusmão, foi determinante para a nossa encarnação na referida luta. Nos anos oitenta, éramos um punhado de jovens sem qualquer experiência organizacional, sem bases teóricas e confrontados com a dura realidade, como posteriormente foi referido pelo irmão Xanana na sua contribuição para a elaboração dos estatutos da LEP (Liga Estudantil Patriótica):

“.... Neste longo e doloroso martírio, o povo Maubere vê-se confrontado com o crucial dilema: ou continuar a sacrificar-se pela Pátria, perante o conformismo das Nações Unidas, favorecendo Jakarta a manter-se ativa na brutal repressão exercida sobre ele, ou, o que não pode nem está disposto a fazer, a conformar-se com o genocídio cultural e religioso, e com o etnocídio que lhe são impostos pelas forças ocupacionistas”.

Naqueles anos difíceis que passamos, sob a pressão e o medo, iniciamos os nossos primeiros passos na organização clandestina, como expressão do total

repúdio à presença dos ocupantes indonésios. Então, tivemos que aprender a lutar! Valeu-nos, nessa altura e durante a aprendizagem, o lema “estudar lutando. lutar estudando”, sugerida pelo então Comandante-chefe das FALINTIL.

Com a nossa inserção ativa na Luta, pouco a pouco, acabamos por melhorar, aprendendo e adquirindo mais experiências sobre conceitos, técnicas e práticas de organização clandestina e, sobretudo, fomos ganhando mais consciência política sobre os valores humanos e sociais, bem como estratégias de luta a adotar para cada uma das etapas que tínhamos pela frente.

Discutíamos sobre quem era realmente o nosso inimigo: o povo Indonésio, a religião, a cultura, ou o regime de Suharto? Nem sempre essas discussões foram pacíficas, por vezes tornavam-se acérrimas e calorosas, mas, sempre com direito à liberdade de expressão.

A Natureza e a Evolução do OJECTIL e FECLITIL

A OJECTIL e a FECLITIL, já em 1988, começaram a acreditar com base na experiência vivida, que o nosso inimigo comum não era a religião, nem a cultura, nem o Povo Indonésio, mas sim o regime ditatorial de Suharto. Com o Povo Indonésio, fosse ele javanês, balinês ou sumatrense, convivíamos e comungávamos dentro dum espírito de amizade e fraternidade. Foi com base nesta percepção que posteriormente, numa ação concertada em 1989, já defendíamos a “indonesianização” (internacionalização) do conflito

político e armado de Timor- Leste na Indonésia. Assim, pensou-se transportar a guerra para aquele país em todas as suas vertentes, acreditando convictamente, que se ela fosse materializada, poderia acelerar o processo democrático na Indonésia.

Com base nesta alteração do mapa político global, talvez as grandes potências mundiais modificassem a sua atitude em relação à questão de Timor Leste, e, obrigar então o regime de Shoarto a dialogar com os líderes timorenses com o intuito de alcançar uma solução pacífica, nomeadamente com o Irmão Xanana, já referenciado pela comunidade internacional como sendo o legítimo representante da Resistência pela Libertação de Timor-Leste, pelo facto de naquela altura estar preso em Cipinang.



*Enkontru no Diskusaun nudar forma rezisténsia
Husi Karuk : Nakflak, Egas, Pe. Domingos Maubere, José
AMX-Siak, Adanu, Gregorio Saldanha, Constâncio Pinto
“Terus” no Nuno Laloran.*

Em consonância com a nova visão estratégica, visto ter havido anteriormente uma percepção errada sobre a identidade do inimigo, foi então que, a partir de 1989, iniciaram-se algumas ações de luta pela obtenção de asilo político para alguns resistentes timorenses, com o objetivo de atrair maior atenção internacional, consciencializar o

povo irmão indonésio da nossa luta e, em simultâneo, alargou-se a ação no campo político, com a finalidade de forçar os militares a aliviar a sua pressão sobre Timor-Leste.

Todavia, apesar das organizações que atuavam na frente clandestina estarem a desenvolver ações mais concertadas e mais incisivas, tínhamos ainda o problema da falta de ligação e comunicação com a frente externa. Para superar esta situação, em Julho de 1989, a OJECTIL estabeleceu, através do companheiro Teódolo Ximenes da CSRNET, sediada em Jakarta, ligações fortes e consolidadas com o Dr. Agio Pereira, atualmente Ministro de Estado e da Presidência do Conselho de Ministros. O Dr. Agio Pereira passou então a ser o verdadeiro elo de ligação entre a FRENTE clandestina e a FRENTE diplomática e, posteriormente em Julho de 1991, para melhorar as ligações e as atividades do exterior, foi nomeado representante especial do CNRM para a Austrália com atividades concretas pelo então Comandante-chefe das FALINTIL.

Por esta altura já estávamos a entrar na fase da luta “semiclandestina”, facto esse que nos proporcionou maior campo de manobra para contactar os grupos de oposição e movimentos pró-democráticos Indonésios, e, foi assim que a rede da luta pela democracia na Indonésia se começava a sensibilizar com a nossa causa, ganhando maior dimensão em 1994 com a presença do nosso irmão Comandante Chefe das FALINTIL em Cipinang. Xanana passou não só a ser o dirigente da luta armada

nas montanhas de Timor-Leste, como também uma fonte de inspiração moral e política para os movimentos democráticos da Indonésia. Atrevo-me mesmo a garantir, que Xanana, por ser uma referência de coragem e valor, passou a liderar todo o processo democrático indonésio.

Muitos jovens estudantes, até mesmo os velhos e os mais renitentes, viam na figura humana de Xanana Gusmão, o orgulho do seu envolvimento na luta pela democracia e eram assim solidários com o povo irmão timorense na luta pela sua libertação. Apesar dos grandes genocídios cometidos, nomeadamente o mais recente e visível massacre de Santa Cruz, o mundo, mesmo abalado pelas notícias, continuava com uma postura “dualística”. Mesmo assim, a Resistência Armada sob a chefia do Comandante-chefe das FALINTIL, continuava a apelar ao diálogo como proposta para a solução do conflito entre as partes beligerantes.

Todavia, o regime de Suharto manteve-se cada vez mais inflexível e acreditava cegamente que o prolongamento da guerra conseguiria exterminar a nossa Luta Armada. Shoerto via, no seu poderio bélico e força económica, uma forma eficaz de sustentar uma guerra prolongada que quando combinada com o chamado desenvolvimento físico, poderia exterminar faseadamente a nossa Luta Armada.

Em 1995, a AST, OJECTIL, GMTTP e BPP ao avaliarem o desenrolar do processo da luta e a correlação das forças militares no

terreno, e, ao estudarem objetivamente a posição política e militar, bem como a situação económica do regime de Suharto, avançaram com a proposta de uma possível luta armada dentro da Indonésia - a guerrilha urbana, caracterizada como um dos métodos mais eficazes para desafiar o regime e acelerar cada vez mais o surgimento de outros métodos que pudessem abalar o setor económico da Indonésia, que era então o pilar sustentador do seu poderio militar, político e diplomático que, entretanto, encetado por este regime.

O Birô Especial e A Brigada Negra (BN)

A plataforma da luta armada na Indonésia tinha duas componentes: uma era a filmagem ou a gravação das operações militares desencadeadas em Timor-Leste pelas FALINTIL. A outra componente eram as ações de guerrilha urbana. Desta forma, a partir de 1995, iniciou-se a entrada de jornalistas estrangeiros para dar cobertura às planeadas ações militares sobre o inimigo indonésio. O filme que mais protagonismo teve na altura foi o assalto de Assalaitula. Este filme, que percorreu o mundo inteiro, sensibilizou não só o público Indonésio mas também quase toda a comunidade internacional. Com a proposta entretanto aprovada pelo irmão Xanana, iniciamos a formação do Birô Especial - órgão político que orientava a BN em estreita dependência do Comando das FALINTIL. O Birô Especial acreditava de que, com o desmoronamento e o colapso da

economia do regime de Suharto, poderia surgir uma consciência social por parte do povo Indonésio que permitisse acelerar a queda do regime ditatorial.

A BN, depois da explosão da bomba em “Demak – Semarang – Java Central” e da captura do seu Comandante Operacional Akita em 15 de Setembro de 1997, em Díli, e ainda da captura da Unidade de Comando Móvel de Java Central, deixou de ser ofensiva militar e passou a ser ofensiva político-diplomática.

Quando o grupo do Shalar Kosi FF entrou na embaixada da Áustria em Jakarta, com o objetivo de garantirem a sua segurança e internacionalizarem a sua causa, o maior erro do regime de Shoenarto foi querer capturar o seu chefe e colaborador do Estado-Maior das FALINTIL (EMF), de quem desconfiavam que tivesse ligações com as redes clandestinas da Indonésia, obrigando-o assim a permanecer naquela embaixada durante 18 meses sob o estatuto de refugiado até à sua libertação. Aquele regime publicava de forma sistemática, notícias sobre a BN, para convencer a Áustria de que esta organização era um grupo de terroristas.

Contudo, o efeito foi o reverso! A BN nunca foi considerada uma organização terrorista e, o Ministério de Negócios Estrangeiros dos EUA, em Outubro de 1997, emitiu uma lista de 30 organizações classificadas como terroristas, onde não constava a BN, apesar do regime indonésio ter intensificado uma grande campanha para

contradizer aqueles factos. Felizmente a campanha teve o efeito adverso ao esperado e a comunidade internacional, inclusive o povo indonésio, adquiriram uma maior sensibilidade sobre as novas capacidades militares da Resistência Armada.

Naquela altura, na Indonésia, entre os militares, políticos e diplomatas havia duas posições bem distintas sobre a existência da BN. O Ministério de Relações Externas da Indonésia preferia “fechar o caso” e não dar muita importância para não fazer publicidade sobre a existência daquela organização. Os militares pretendiam dar maior publicidade sobre o sucedido a fim de convencer a Áustria a entregar o colaborador da EMF que ali se encontrava. Como já se disse, só à história compete, avaliar a contribuição positiva ou não da BN e de todos os seus colaboradores e combatentes que lutaram, tal como outras organizações, pela libertação do povo Maubere.

Hoje assistimos a entrega das provas que fizeram parte da nossa luta. Desta forma, todos os nossos feitos no contexto da Luta pela Libertação da Pátria, farão parte integrante da história de Timor-Leste, para que um dia, os filhos deste jovem país se sintam orgulhosos das suas origens. Hoje estamos aqui presentes e vós sois as testemunhas vivas dos nossos actos praticados pela libertação de Timor-Leste.

O Nascimento das BRITAS

A nova organização será constituída enquanto reencarnação da BN, com a passagem dos seus valores filosóficos e do seu nacionalismo e patriotismo para a nova fase da Luta: **“Transformar as Mentalidades, Transformar a Sociedade - Libertar o seu Povo”**. Esta organização que nasce hoje chamar-se-á **“BRITAS”**. **Porquê Transformar as Mentalidades?** Porque vivemos uma mentalidade alienada! **Porquê transformar a Sociedade?** Porque temos uma sociedade apática, desinteressada, desorientada, dependente, individualista e sem iniciativa, que pensa que o Estado tem a obrigação paternalista de fazer tudo por eles. Temos que enfrentar a realidade da nossa sociedade, que é efémera e desorganizada, que não conseguirá resistir aos novos desafios internos e externos e que, nos poderá levar novamente à luta, não armada mas económica, no contexto da sobrevivência dos povos num mundo cada vez mais globalizado. A **BRITAS** é uma organização de **COMBATENTES NÃO VETERANOS**, de cariz socioeconómico e cultural, que se insere sob o plano da luta pela transformação de mentalidades e da sociedade, no contexto de uma nova etapa de LUTA: **“LIBERTADA A PÁTRIA, LIBERTAREMOS O SEU POVO”**.

Notas Finais

Após de mais 4 (Quatro) décadas de silêncio consciente e voluntário, tentamos reunir, nestas páginas, os vestígios históricos, não

para falar dos nossos feitos heróicos individuais, mas sim, para deixarmos vivos e cravados, os testemunhos que fizeram parte da atividade clandestina de cada um de nós durante décadas de luta pela libertação da nossa querida Pátria. Esperamos que estes documentos e as nossas memórias passadas, possam contribuir de forma relevante para o acervo do arquivo histórico de Timor-Leste, para que, num futuro próximo, os mesmos sejam a base sólida que permita aos nossos historiadores escrever sobre a história da nossa luta, sem menosprezar ou esquecer todos os que contribuíram, de uma forma ou de outra, dignamente, na nossa árdua e dolorosa marcha, sabiamente dirigida pelo nosso irmão Xanana Gusmão depois da destruição das nossas bases vermelhas em 1978.

**RENETIL-Resistência Nacional
dos Estudantes de Timor-Leste
Autór: Diresaun RENETIL**

Brutalidade Militar

Ikus husi Operasaun Seroja konsege harahun duni baze apoiu hodi hakotu *Guerra da Posicoes*. Husi ne'e populasaun ho kuadru FRETILIN-FALINTIL barak mak mate, rende no nakfilak-an. Krizi aihan sei kontinua afeta ema nia moris, ho forsa be menus bebeik, apoiu husi liur ba Timor-oan seidauk klaru no forte hodi halo Timor oan barak duni mak moral monu. Kondisaun ne'e hanesan atu lori ona

Indonézia nia ejemonia, no ukun ida rohan-laek ba Timor.

Hafoin operasaun eskala boot, husi lalehan, tasi no rai, estratéjia militar hahú falun ho modelu oinsá atu Indonézia bele hamaus fali ema Timor, hafoin hare ho matan, kaer ho liman ba hahalok asasinadu brutal no barbarika ne'ebé halao no hamosu husi rejime tirania militar Indonézia. Maske nune'e, Indoneziasaun ne'ebé dudu husi Indonéziu hodi halo Timor oan sira sai no imajina-an nudar Indonézia oan nakfilak sai fali ai-tarak ne'ebé sona tutuir sira nia ain okos. Tanbá laos deit Indoneziasaun ba ema Timor, maibé Timor-oan sira Indonézia haruka ba eskola iha Bali, Jawa, NTB, NTT nsst, no halo tiha Indoneziasaun konfliktu Timor ba ema Indonézia sira. Katak ema Indonézia laos ema Timor nia funu-balun, maibé ho rejime brutal militar iha Jakarta ne'e mak funu-balun lolos hasoru Timor-oan, no problema Timor hanesan mos problema ema Indonézia nian.

**RENETIL: Natureza no ninia
Evolusaun Estrutura**

Iha tranzisaun no faze husi todan sira ne'e mak hamoris organizasaun ho baze estudante no juventude dahuluk iha Indonézia ne'ebé hanaran *Resistência Nacional dos Estudantes de Timor-Leste*, ho badak bolu RENETIL. Estudante Timor sira ne'e governu Indonézia haruka ba eskola fali iha provinsia seluk iha Indonézia laran. Maske fraku boot ne'ebé ema Timor foin hasoru liu ba, la hamate sira nia neon hodi luta ba kauza ukun-rasik-an. Tan nune'e, liu tinan naruk hafoin

halo analiza klean konaba konjuntura política iha rai-laran, iha Indonézia no iha rai-liur, estudante bolseiru na'in sanulu ne'ebé mai husi Universitas Udayana Denpasar (UNUD), no Universitas Pendidikan Nasional (UNDIKNAS), iha loron 20 fulan Juñu tinan 1988, deklara Insurreiçáo Geral Política dos Estudantes de Timor-Leste nudar loron fundasaun RENETIL nian. Biar nune'e, atividade hodi harii organizesaun no mobiliza estudante sira hodi partisipa iha luta ba Libertasaun hahú kedas husi 1986.

Hahú ho estudante nain sanulu mak hanesan Lucas da Costa "Lahe-Mau ka Rama Metan"; Fernando de Araujo "La'Sama"; José Ximenes Gonçalves "Si'ak"; Carlos da Silva Lopes "Freezip ka Radihka Saky"; Agapito Mauloco "Mau-Loco"; Marciano O. G. da Silva "Chury Sakar Subar"; João de Araujo "Mau-Terus"; Julio Abel Ribeiro "Taetudak"; Adolfo Fontes "Mau-Lamas"; no João Cardoso "Mau-Riba". Estudante sira ne'e mesak bolseiru deit ne'ebé sai mos fundadór ba organizesaun ne'ebé halo gerrila urbana, no hanesan "bomba ida perigozu tebes" iha Indonézia laran, no ba nia okupasaun brutál iha Timor.



Fundador RENETIL

Bainhira RENETIL harii hahú ho estrutura ne'ebé simples no kiik tebes. Estrutura jerál konsiste husi Sekretáriu-Jerál, hamutuk ho Adjuntu nain-ida, no Asistente nain-hat, mak hanesan Assistente de Informação e Segurança, Assistente de Investigação Política, Assistente de Organização no Assistente de Agitação e Propaganda. Husi estrutura kiik ida ne'e, hafoin rekruta tan membru sira husi tinan ba tinan hodi iha mudansa ba estrutura sai boot liu tan. Tan nee, RENETIL halo ona re-estruturasaun dala-tolu, dauluk iha tinan 1990 hafoin RENETIL halo nia konferénsia dahuluk, no tuir fali mai iha 1992 no 1995 tanbá nesesidade estrategia funu nian.

Inisiativa harii RENETIL husi estudante sira rasik, la simu orientasaun husi líder polítiku iha FRETILIN ka komandante FALINTIL ruma. RENETIL harii husi estudante sira rasik, tan ho konsiénsia no espírito nasionalista, patriótika no revolusionáriu ne'ebé hakarak hatutan luta ba libertasaun total no completa ba Timor-Leste. Husi nia harii to'o fali Maiu 1989, RENETIL hanesan organizesaun partidaria, katak organizesaun klandestina estudiantil FRETILIN nian. Maibé atu reforsa Unidade Nasionál, mak iha 1989, Comando Superior da Luta no Comandante em Chefe FALINTIL Xanana Gusmão, husu RENETIL hodi muda nia prinsipiu partidáriu ba fali apartidáriu ho objetivu hodi hakoak estudante Timor-oan hotu, la hare ba kor partidu.

Papél no Prinsípiu

Atu halo tomak ninia dever nasionalista no patriótika, RENETIL defini ninia prinsípiu no liña jerál ba orientasaun sira hanesan, (i) izola kedas estudante Timor-oan sira husi influensia ideolójika, polítika, ekonomia no sosio-kulturál ne'ebé dezenvolve husi governu Fasista-Militarista iha Jakarta; (ii) dezenvolve atividade polítika ne'ebé iha rezonansia internasionál ho objetivu hodi informa sai krimi hotu ne'ebé komete husi governu “liman-laran-ran” iha Jakarta hasoru gloriozu Povu Maubere no halakon prezensa kriminozu invazór Indonézia ho nia liman-ain sira husi rai Timor-Leste; no (iii) prepara ema profesionál



elevadu sira ho konsiénsia revolucionáriu hodi kontinua luta ba Libertasaun Povu Maubere liuhusi rekonstrusaun nasional Timor-Leste nian.

Tan nune'e, RENETIL nudar organizasaun masa ida ne'ebé laos atua ho klandestina puru maibé ho modelu semi-klandestina liu. Maibé bainhira atu halo indoneziasaun ho internasionalizasaun funu Timor, maka halo manifestasaun nakloke ho haksoit tama ba okupa embaixada.

Sorin seluk, RENETIL mos halo nia operasaun ne'ebé la iha didin-lolon ida hodi satan netik nia bok-an, katak maske harii iha Bali, loke sela iha Timor no Indonézia laran maibé RENETIL mos iha nia



Ocupantes da Embaixada dos EUA, em Jacarta, apresentam as suas reivindicações

representante no operasaun iha rai-liur, hanesan iha Portugal, Reinu Unidu, República Irlândia no Austrália. Ho objetivu atu internasionaliza konfliktu Timor.

Indonéziasaun no Internasionalizasaun

Organizasaun ida ne'e harii tanbá liuhusi formasaun klamar, liu-liu neon ida klean kona-ba kauza ruma. Analiza kontestu ne'ebé sira halo molok harii iha 1988, esperiénsia fundador sira nia durante iha Timor, halai ba ai-laran, hasoru susar ho ajar oin-oin, ba eskola mos tanbá governu Indonézia hakarak fase sira neon no hanoin hodi fila ba Timor karik bele serve nudar manutalin administrasaun sivíl militar Indonézia nian iha Timor, maka ikus mai fundadór sira adopta filosofia “antes sem título, do que sem pátria” diak liu lakon titulu duke lakon ita nia rain. Filosofia ne'e mak sai matalan mos ba sira, no ida ne'e laos deit hakerek funan-funan iha surat-

tahan mutin nia leten, mamuk deit, maibé sira tau duni iha prátika. Tan RENETIL nudar organizasaun masa ne'ebé orienta ba asaun, ho nune'e iha RENETIL nia lema rasik bolu *Unidade e Ação*, katak unidade iha hanoin, estratejia, tática no asaun.

Atu bele hetan RENETIL nia estratejia kona-ba indoneziasaun no internasionalizasaun konfliktu Timor-Leste maka RENETIL halao programa sira hanesan, (i) halo rekrutamentu ba membru foun hodi reforsa filleira RENETIL nian atu bele hatutan luta naruk no todan; (ii) halo konsiensializasaun no mobilizasaun ba estudante Timor-oan sira hotu-hotu tenki hola papél ativu iha luta ba Libertasaun Nasionál Timor-Leste; (iii) halo ligasaun ho organizasaun no movimentu pro-demokrasia sira iha Indonézia laran hodi hamutuk halo funu hasoru rejime Soeharto ne'ebé hanehan povu rai rua ne'e; (iv) halo kontaktu no ligasaun ho organizasaun internasionál ba asuntu direitu ema nian, Amnestia Internasionál, organizasaun solidaridade internasionál ho mos organizasaun juvenil-estudantil sira; (v) halo lobby informál ba embaixada hodi kontra propaganda no disinformasaun Indonézia nian; (vi) denuncia tutuir krimi ne'ebé Indonézia halo ba Timor-oan, liuhusi média rai-okos "*underground media*", ka karta ne'ebé haruka ba jornál, rádiu no organizasaun direitu ema nian iha Indonézia laran, nomos iha liur; (vii) organiza no kordena ba asaun hamutuk ho organizasaun solidaridade internasionál atu halo presaan bebeik ba rejime Indonézia atu respeita direitu Timor-oan sira

nian ba auto-determinasaun no ukun-rasik-an; (viii) organiza no halo asaun hamutuk ho organizasaun juvenil-estudantil nian iha rai-laran, Indonézia nomos iha rai-liur hodi dada atensaun comunidade internasionál nian mai problema Timor-Leste; (ix) hola parte ba membru organizasaun juvenil-estudantil hodi bele denuncia krimi hotu ne'ebé Indonézia halo hasoru ema Timor; (x) mobiliza ema Indonézia iha asaun sira hodi ejiji direitu auto-determinasaun no referendun iha Timor-Leste, no liberdade ho demokrasia ba Indonézia; (xi) organiza no ba tuir konferénsia internasionál sira hodi denuncia krimi hotu ne'ebé Indonézia halo iha Timor-Leste, no defende direitu auto-determinasaun no ukun-rasik-an ba Timor; no (xii) halo *speaking tour* husi rai ida ba rai seluk, liuhusi representante RENETIL iha rai liur.



Demonstrasaun Pasifika iha Portugal



Demonstrasaun Pasífika iha Madrid, España



Demonstrasaun Pasífika iha Alemaña



RENETIL ho ninia Asaun

Iha asaun lubuk hirak mak rekoñese hanesan susesu boot ba RENETIL. Hanesan organiza lori tama jornalista Australianu Robert Domm mai iha Timor no konsege hasoru hodi dada-lia ho Komandante Xanana Gusmão iha ai-laran, maske jenerál Indonézia lubuk ida mak buka tun sae maibé la hetan. Iha mos demonstrasaun iha rai-liur no iha Indonézia, RENETIL nia membru balun iha rai-laran, hola parte mos iha manifestasaun istóriku sira hanesan iha Tasi Tolu, iha biban ne'ebé Papa João Paulo II halo vizita mai Timor. Nune'e mos membru balun hola parte iha demonstrasaun 12 Novembru 1991, ne'ebé lori to'o ba iha trajédia ida. Asaun hirak nune'e konsege doko jenerál Indonéziu-sira tanba, fo sinál katak rezisténsia armada no klandestina husi ema Timor rasik sei iha no metin.

Manifestasaun nakloke sira hamaluk mos ho mobilizasaun opiniaun liuhusi média ne'ebé RENETIL prodúz. Atu halekar no haklaken problema Timor ba iha comunidade internasionál, ema Indonézia ho Timor-oan, no oinsá atu neutraliza no kontra-propaganda falsu husi Indonézia, maka

RENETIL tenki prodúz buletin no revista oioin mos. Buletin dahuluk bolu Neon Metin (1988) ne'ebé hakerek iha lian Portugés, Lorico Lian iha tinan 1994 ho dalen Tetun, Larigutu iha tinan 1994 ne'ebé hakerek ho dalen Indonézia. Maibé molok ne'e iha mos Buletin Kay Rala Lian iha tinan 1992, Unidade e Resistência iha tinan 1995, no Martir iha tinan 1996. Iha mos revista, hanesan Talitakum iha tinan 1998 no seluk-seluk tan.

Nota Final

Harii organizasaun moris iha estadu ida ho rejime militar nia husar tutun, laos fasil atu lao ho diak, tanba mate laos realidade ne'ebé bele hadok. Maibé ho susar no terus oioin, hanesan ameasa ba membru nia moris, rekursu finanseiru ne'ebé menus, traisaun no mauhu ba malu, hadau malu poder no seluk-seluk tan, la hamate knar lulik ne'ebé membru RENETIL sira halao no mehi ba.

**DEWAN SOLIDARITAS
MAHASISWA TIMOR-TIMUR
(DSMTT) Transforma Kampus
UNTIM ba Kampus Luta nian iha
1998 – 1999
Autór: Diresaun DSMTT**

Transformasaun UNTIM ba "Kampus Perjuangan"

Iha 20 Setembru 1986, líder polítiku Timor oan no militar Indonesia nian balun, mak hanesan Governador Timor-Timur Enj. Mário Viegas Carrascalão (matebian), Ketua DPRD Propinsi Timor Timur José Valente

(matebian), Florentino Sarmiento, Salvador Soares no seluk tan harii Fundasaun Lorosa'e hodi harii Universitas Timor-Timur (UNTIM), ho kampus sentral iha Kaikoli, Díli. Tuir sira katak, entre objetivu atu harii UNTIM mak atu fó oportunidade ba estudante no/ka foin-sa'e sira ne'ebé la iha kapasidade finanseira ka la hetan bolsu estudo husi Governu Indonéziu atu asesu edukasaun iha nível ensinu superior-rejiaun Jawa Indonézia.

Iha UNTIM, aleinde estuda, estudante no/ka foin-sa'e Maubere-oan sira mos kontinua organiza sira an iha grupu klandestina oioin hodi apoiu Frente Armada no halo kontaktu ho Frente Diplomátika hodi defende hakarak lulik Povu Maubere nian: Ukun Rasik An. Lihusi kampus ne'e estudante no joven sira aprende atu luta. Iha prosesu luta ne'e estudante-joven sira hetan inspirasaun makas husi líder istóriku sira FRETILIN/RDTL nian hanesan Francisco Xavier do Amaral, Nicolau dos Reis Lobato, Abílio Araújo, José Ramos Horta, Mari Bin Alkatiri, José Alexandre Xanana Gusmão, no seluk-seluk tan ne'ebé hahú alserse Libertasaun Nasionál ba povu no uma lulik Timor-Leste. Estudante-joven sira fiar katak sira presiza hamoris nafatin ahi rezisténsia nian iha UNTIM laran hodi kontra nafatin narrativa indonéziasaun ne'ebé nível edukasaun oioin impoen iha territóriu Timor-Leste.

Líder polítiku no militar Indonézia nian koko kontrola movimentu estudante nian hodi harii Asosiasaun Estudante Munisipál, inklui iha nivel postu administrativu

atu celebra dominasaun forsa militar Indonézia nian iha território ne'e, liuhusi loran nasonál oioin Indonézia nian. Ofisiál militar barak no estrutura Governu Indonézia nian mak sai nudar konselleiru ba asosiasaun estudantíl hirak ne'e, hodi nune'e estruturalmente kontrola no oprimi estudante sira iha rezisténsia. Relativamente UNTIM, Presidente Fundasaun Lorosa'e ne'e representa husi vise-governadór, ne'ebé normálmente brigadeiru jenerál ida iha Forsa Armada Indonézia (ABRI). Maske nune'e, opresaun haburas nafatin rezisténsia. To'o tinan 1988, sira sempre ativa organiza asaun Pro-Indonézia iha Kampus Kaikoli.

Situasaun iha UNTIM sai hanesan ahi iha hare-kulit laran ne'ebé pruntu atu alastra ba fatin seluk iha momentu naran ida, no situasaun ne'e transforma kampus UNTIM Kaikoli sai nudar kampus perjuangan (Kampus luta nian), hasoru tratamentu dezumanu oioin ne'ebé mosu iha sociedade. Dehan katak Organizaun klandestina ida ne'ebé involve ativu iha luta transformasaun Kampus UNTIM iha baze rezisténsia mak HPP-MAI (Himpunan Pemuda Pelajar Mahasiswa Anti-Indonesia/Integrasi), hahú sistimatikamente penetra kampus 1989.

Estabelesimentu DSMTT

Dewan Solidaritas Mahasiswa Timor-Timur (DSMTT) harii iha 8 Juñu 1998 husi estudante universitáriu-sira. Hafoin funda DSMTT iha 8 Juñu 1998, iha 9 Juñu 1998, ativista universitáriu nian halo reuniaun hodi haklean liu tan vizaun

no misaun DSMTT nian. Vizaun husi DSMTT naton ne'e mak Timor-Leste ida independente (ukun-rasik-an) ne'ebé livre husi forsa okupante oioin, esepialmente Indonézia, hodi nune'e permite ninia sidadaun sira harii sociedade Timorenses ida-ne'ebé unida, justa, solidária no próspera. Ho ninia misaun mak organiza grupu estudante hodi luta hamutuk ho povu no componente rezisténsia oioin, inklui ho grupu solidariedade internasionál iha rai seluk, atu promove diálogu rekonsiliaaun entre faksan polítika oioin, organiza palku livre atu proativamente ezije no buka solusaun ida ne'ebé internasionálmente aseitável ba problema Timor-Leste nian. Estratejikamente Dewan Solidaritas mós servisu ho ONU ba susesu prosesu referendu iha Timor-Leste, nudar aktu finál auto-determinasaun ba ukun-rasik-an.



DSMTT hanesan interveniente prinsipál ida ba luta Libertasaun Nasionál durante período 1998-1999 bainhira organizaun estudantíl ne'e aproveita janela oportunidade husi movimentu democratizasaun reformasaun iha Indonézia hodi organiza diálogu no lidera palku

libertasaun (mimbar bebas) iha kampus UNTIM laran hodi to'ó ba distritu no sub-distritu tomak iha Timor-Leste hodi sukat hakarak lulik husi povu iha rai doben ida-ne'e. Durante época husi 1998 no inísiu Setembru 1999, DSMTT sai hanesan sumbriña ka salurik ba kuaze 15.000 universitáriu, estudante no joven sira ne'ebé ho badinas no aten-brani luta ba Libertasaun Nasionál.

DSMTT ne'e organizasaun estudantíl ida ne'ebé ho baze iha UNTIM, bainhira Fundasaun Lorosa'e realiza atividade aprendizajen nian iha inísiu Juñu 1998. DSMTT mos ikus mai ho espíritu non-violensia okupa espasu públiku oioin iha Dili laran, espesiálmente okupa no paraliza funsionamentu Dewan Perwakilan Rakyat Daerah (DPRD) Timor-Timur iha Kaikoli, Díli. Atividade oioin husi DSMTT ne'e hetan rekoñesimentu internasionál liuhusi apresentasaun Student Peace Prize 1999, prémiu ida-ne'ebé espesiálmente dedika ba luta estudante nian ba pás no dame iha mundu. DSMTT mak resepiante dahuluk prémiu ne'e.

Janela Oportunidade husi Reformasaun iha Indonézia

Situasaun manifestasaun hetan ninia pontu kulminante iha Maiu 1998 bainhira ditadór Soeharto rezigna an iha Indonézia durante prosesu demokratizasaun Reformasaun iha rai-ne'ebá. Hodi haree ba janela oportunidade ne'ebé mosu, ativista universitáriu sira ne'e organiza diskusaun informál oioin hodi aborda tópiku hirak ne'ebé pertinente ba situasaun Timor-Leste

naton ne'e, hanesan oinsá atu unifika organizasaun rezisténsia oioin iha Timor, promove diálogu no rekonsiliausaun entre líder Timor-oan sira ne'ebé adopta ideolojia política diferente, no mós promove sentimentu solidariedade entre Timor-oan sira, ne'ebé sai nudar pré-rekizitu ba estabelesimentu dame no pás, nune'e ho espíritu unidade nasionál luta ba Libertasaun Nasionál, liuhusi solusaun ida-ne'ebé internasionálmente aseitável: referendu ne'ebé ONU rasik mak superviziona.

Líder no ativista universitáriu sira halo mos aproximasaun oioin ba líder polítiku sira, tantu husi bloku pro-Indonézia no pro-independénsia, atu solisita sira-nia hanoin kona-ba kauza Timor-Leste nian. Iha diálogu ka audiénsia hirak ne'e, universitáriu sira argumenta katak, apezárde pozisaun política oioin, dalan di'ak liu ne'ebé internasionálmente aseitável mak referendu. No pre-kondisaun ida ba referendu mak tenke iha diálogu no rekonsiliausaun entre Timorenses sira, retira imediata husi Forsa Armada Indonézia husi Timor-Leste no dezarmamentu ba grupu milísia pro-Jakarta no mós liberdade inkondisionál ba prizioneiru polítiku sira iha Indonézia no iha Timor-Leste, no prezensa Organizasaun Uumanitária Nasoens Unidas.

Atividade importante ida ne'ebé movimentu ne'e organiza mak manifestasaun pasífika iha forma palku livre iha 5 Juñu 1998 iha Kampus Kaikoli Díli ne'ebé permite polítiku sira husi faksau oioin atu hato'ó sira-nia pensamentu hodi

solusiona problema Timor-Leste. Husi palku livre ne'e partisipante sira ezije atu ONU, Portugal no Indonézia presiza rona Timor-oan sira nia aspirasaun hodi buka solusaun ba problema Timor-Leste. Aleinde ida-ne'e, ezije mós ba líder polítiku Timor-oan sira atu halo diálogu hodi nune'e bele kria kondisaun ba Timor-oan sira atu ho hakmatek deside sira-nia destinuluuhusi referendu. Asaun pasífika iha 5 Juñu 1998 ne'e hetan krítika husi Reitor UNTIM tanbá ninia parte la permite universitáriu halo asaun política práttiku iha kampus laran.

Estrutura DSMTT I (1998-2000)

Estrutura DSMTT mosu tanba razaun estratéjika no téknika atu organiza atividade DSMTT nian iha nível nasional, ensinu superior, distritál no sub-distritál. Nune'e estrutura DSMTT nian estabesele to'o iha nível kecamatan (agora, postu-administrativu) ne'ebé halo atividade tama to'o desa (suku) sira. Estrutura DSMTT ne'e fleksível hodi refleta katak organizaun ne'e bazeia ba masa estudante no/ka universitáriu, tuir nesesidade iha terrenu. Hahú kedas Juñu 1998, estudante barak mak la tama ona eskola hodi tun ba baze organiza diálogu no palku livre, apezarde konstranjimentu oioin ne'ebé governu Indonézia impoin. To'o iha Maiu 1999, estudante sira konsentra hotu ona iha distritu no sub-distritu, hodi servisu hamutuk ho komponente rezisténsia oioin hodi susesu ba prosesu konsulta populár iha Timor-Leste.

Dewan Solidaritas liga Direita ba Comando da Luta, liu-husi

konsulta besik ho Prezidente CNRT Kay Rala Xanana Gusmão, iha Jakarta no servisu besik mos ho Comité Diretiva FRETILIN Lu Olo, Mau Huno no Mau Hudo. Estrutura operasionál DSMTT nian iha momentu ne'ebá maka kompostu husi Konselleiru, Kordenadór Jerál, Sekretáriu, Tezoreira no seksaun-sira hanesan Administrasaun, Relasaun Públika Mobilizasaun Masa no Diálogu, Relasaun Esterna, Ligasaun ho ONU, Diálogu no Rekonsiliaun, Direitu Umanu no Justisa, Grupu Feto Foin-sa'e, Mídia no Komunikasaun, Saúde no Primeiru Sokorru no Seguransa. Ensinu superior ne'ebé hola parte iha DSMTT maka UNTIM, Politéknik Hera, PG-SD, PAM-KT Díli, IPI-Filiál Lahane, STIE Tasi-Tolu no IMAPPTIM.

Palku Livre no Diálogu Rekonsiliaun iha Nasional

Bazeia ba estrutura DSMTT nian hala'o atividade husi Juñu 1998 to'o Maiu 1999 hodi hasa'e konxiénsia públika (public awareness) kona-ba importánsia unidade nasional no autodeterminasaun, advoka estabesimentu pás no dame iha rai ne'e no atividade balu ne'ebé hala'o molok no durante konsulta populár,



inklui política sunu-mutuk Timor hafoin anúnsia rezultadu konsulta populár iha 4 Setembru 1999. Organiza diálogu rekonsiliausaun abertu no palku livre iha Díli no distritu nune'e mós sub-distritu 65 iha Timor-Leste. Iha Díli, fatin konsentrasaun ba diálogu abertu no palku livre ne'e mak Kampus Sentrál Kaikoli ne'ebé konsekuentemente tuka atividade prosesu ensinu aprendizajen iha UNTIM husi kedas meadu Juñu 1998.

Iha mos manifestasaun ka pawai keliling (komísiu) ne'ebé hala'o iha Díli, durante protestu hasoru militar Indonézia ne'ebé tiru-mate Herman das Dores iha 16-18 Juñu 1998, ne'ebé rezulta okupasaun ba assembleia provinsial, durante vizita Ambasadór Troika Uniaun Europeia nian mai Timor-Leste iha 27-30 Juñu 1998 no durante vizita representante Sekretáriu Jerál ONU nian, Sr. Jamsheed Marker, hafoin kazu Masakre Alas iha Outubru 1998.



Diálogu Abertu iha Nivel Distritál

Iha nivel distritál, hahú husi Oecusse to'o ba distritu sira seluk representa estudante universitariu-sira organiza palku livre atu orienta sociedade-sira hotu hodi vota ba ukun-rasik-an. Atividade ne'e hetan apoiu deit husi parte Igreja Katóliku iha kada distritu. Iha Likisá maka

labele realiza diálogu no palku livre tanbá terror ne'ebé intensifika hasoru movimentu pro-independéncia, liuliu hasoru líder estudante sira tan-ne'e sira barak mak ba hela hamutuk ho elementu forsa armada iha ai-laran. Maske nune'e estudante sira iha Likisá hala'o nafatin door-to-door hodi kampaña referendu.

Aleinde hala'o diálogu no palku livre iha distritu-sira, estudante sira mós realiza atividade hanesan iha nível sub-distritu sira, nudar kontinuasaun ida husi diálogu iha nível distritál. Husi diálogu no palku livre ne'e mosu eziyéncia komún hirak hanesan tuir mai ne'e:

1. Ezije ONU atu inisia nafatin prosesu diálogu tripartite entre ONU, Portugal no Indonézia hodi buka solusaun ida ne'ebé aseitável ba problema Timor-Leste;
2. Ezije ONU atu hasai rezolusaun hodi obriga retira imediata Forsa Armada Indonézia nian husi Timor-Leste hodi nune'e hakotu violasaun direitu umanu oioin hasoru povu Timor-Leste no haruka forsa manutensaun pás ONU nian mai iha Timor-Leste;
3. Liberdade inkondisionál ba prizoneiru polítiku Timor-Leste nian, espeisialmente Prezidente CNRT no Comandante em Chefe FALINTIL, Kayrala Xanana Gusmão;
4. Apela ba líder polítiku Timor-oan sira atu tur hamutuk hodi halo diálogu rekonsiliausaun hodi nune'e

Timor-oan sira moris hakmatek hodi deside sira-nia futuru, nudar kontinuasaun ida husi AETD ne'ebé hala'o ona dezde Juñu 1995;

5. Ezije ONU atu organiza referendu ida ba Timor-Leste hodi nune'e povu husi rai ne'e ezerse sira-nia direitu ba auto-determinasaun.

DSMTT nia Partisipasaun Nível Nasionál-Internasionál

Líder estudante sira iha nível nasionál partisipa mos iha eventu oioin hanesan All-inclusive Intra East-Timorese Dialogue (AEITDs), Rekonsiliaun Dare I iha Setembru 1998. Kordenador Jerál DSMTT halo enkontru ho Prezidente CNRT/Comandante em Chefe FALINTIL nian iha Kadeia Salemba atu fo informasaun-sira konaba ezisténsia DSMTT nian no konsulta ideia-sira relasionamente defende mahalulik Timor-Leste. Realiza mos enkontru ho Comité Diretiva FRETILIN no akompaña Prezidente Francisco Xavier do Amaral no Líder FRETILIN Mau Huno, iha visita ofisiál ba iha Gabinete Prezidente Jorge Sampaio iha Palacio do Belem iha Portugál Novembru 1998. Líder estudante sira mós hasoru envidu espeziál Sekretáriu Jerál Nasoens Unidas nian hanesan Jamsheed Marker, Tamrat Samuel, no Francesc Vendrell iha okaziaun oioin husi sira-nia vizita mai Timor-Leste. Aleinde ida-ne'e representante sira mós hasoru representante Amnesty International no organizaun sira

seluk ne'ebé haknar an iha área direitu umanu.

DSMTT mos halo komunikasaun lubuk ida ho organizaun internasionál oioin ne'ebé solidariza ho kauza Timor-Leste, hahú husi Asia Pacific Coalition for East Timor (APCET) Manila, Indonézia (FORTILOS no SOLIDAMOR, FORSOLIDARESTE), Austrália (ETISC, USET), Japaun, Irlândia, Áfrika Súl no rai selseluk tan. Representante DSMTT partisipa enkontru organizaun estudantil, Juvenil rezisténsia ho Prezidente CNRT/Comandante em Chefe FALINTIL nian iha Kadeia Salemba iha 9 Marsu 1999, objetivu husi enkontru ne'e konsolida no fortifika unidade nasionál hodi fo susesu ba Libertasaun Nasionál. Iha Austrália, Dewan Solidaritas servisu besik ho University Students for East Timor (USET) Melbourne.

Prezensa UNAMET iha Timor-Leste

Kordenador Jerál DSMTT nian hasoru malu ho Misaun dahuluk ONU nian Collin Steward no Mark Guateman iha Aviaun entre Denpasar no Dili iha 13 Maiu 1999, hodi hamosu plataforma koperasaun mak liu-husi DSMTT ofere interpretar ba ONU ninia misaun. Nune'e, durante prezensa UNAMET iha Timor-Leste DSMTT fó kursu Inglés ba kondutór no interpretér sira atu nune'e bele halo servisu ho Misaun ONU nian. Atividade kursu ne'e dala-barak hala'o iha Kampus Fakuldade Edukasaun nian iha Matadoru, Dili. DSMTT mós halo ligasaun ho pesoál administrasaun

ONU nian hodi rekruta Timor-oan nasionalista sira iha misaun ONU nian. Iha tempu hanesan, DSMTT mós frekuentemente halo enkontru ho Xefe Misaun ONU nian, Ian Martin, ho ninia pesoál sira hanesan David Wimhurt no Collin Steward hodi atualiza situasaun iha terrenu no buka solusaun imediatu ba problema balu ne'ebé mosu.

Iha nível distritu no sub-distritu, DSMTT konvoka nafatin enkontru hodi enkoraja povu katak ONU sei garante seguransa konsulta populár nian no katak ONU sei hela nafatin iha Timor-Leste depois konsulta populár ne'e. Iha situasaun hirak ne'ebé difisil, DSMTT hala'o door-to door campaign ba rezeita pakote autonomia espesial ne'ebé Indonézia oferese mai Timor-Leste iha konsulta populár. DSMTT ninia membru lubuk ida mak vítima ba violasaun direitus umanus tan atividade hirak ne'e.

Konsulta Populár 30 Agostu 1999

Durante konsulta populár iha 30 Agostu 1999, DSMTT mobiliza ema atu vota, inklui transporta sira ne'ebé hetan difisiénsia física atu to'o ba iha sentru votasaun hodi vota. Sira rasik mós vota iha votasaun determinante ne'e. Hafoin votasaun, sira mobiliza fali populusaun atu sai ba fatin hirak ne'ebé seguru atu evita asaun violentu oioin ne'ebé Forsa Armada Indonézia, ninia Polísia no grupu milísia pro-Jakarta sira hala'o. Balu konsege salva populusaun seluk maibé la konsege salva sira an husi trajedia ne'e.

Hafoin konsulta populár, maioria membru husi DSMTT nian

hakas an atu reorganiza liuhusi buka-tuir ninia membru sira, iha nível nasional no distritál. Sira barak mak hetan situasaun ne'ebé difisil tanba separasaun oioin no balu buka atu halo servisu ho ajénsia umanitária oioin hodi hahú moris foun. Balu hakarak fila hikas fali ba universidade hodi kontinua sira-nia estudu, maske eis kampus UNTIM naton ne'e InterFET mak okupa. Estudante lubuk protesta atu ONU no líder Timor-Leste sira loke fali universidade ne'e hodi nune'e permite estudante sira kontinua sira-nia estudu avansadu. Maibé tan la hetan resposta imediata, liuliu depois hare profesór Indonézia barak ne'ebé husik hela Timor-Leste, sira barak deside atu sai profesór hodi nune'e bele fó edukasaun no formasaun ba futuru líder Timor-Leste nian. Membru DSMTT barak mak loke eskola no okupa pozisaun oioin iha parte edukasaun nian, hahú InterFET to'o mai to'o ohin-loron. Ida-ne'e hanesan realizasaun ida husi kompromisu ne'ebé membru DSMTT sira halo iha Denpasar no Dili katak depois ukun-an, etapa dahuluk ne'ebé DSMTT sei halo mak fila-hikas ba eskola.

Nota Final

DSMTT sai nudar interveniente ida importante iha luta ba Libertasaun Nasionál. Ho ninia kontribuisaun oioin iha luta libertasaun ne'e entre 1998-1999, DSMTT marka ninia história nudar organizasaun rezisténsia ida ne'ebé ho baze iha kampus UNTIM no husi ne'ebá habelar ahi-klak rezisténsia nian iha juventude no estudante sira le'et, to'o iha sociedade Timorens

nia laran. Perfil ne'e koko atu halo reflesaun ida hodi hakerek história DSMTT nian iha luta Libertasaun Nasionál. Perfil ida-ne'e sai nudar kontribuisaun inisiál ida ba esforsu hakerek história ka narrativa ida hodi kontribui ba narrativa grande kona-ba luta Libertasaun Nasionál Timor-Leste nian.

**Mídia Mainstream Estados Unidos
Amérika iha Trajedia Timor
1975-1999**

Autór: Antero Benedito da Silva

Horiuluk-liu mídia refere ba komunikasaun liuhusi dalan imprimi mak jornál, magazin, livriñu (booklet) billboards no brosurasira, no mídia eletrónika mak Rádio no Televizaun. Ohin loron mídia ninia lalaok muda dramátika tanba dezvoltamentu ne'ebé rápida iha área informasaun no teknolojia hodi mídia hahú inklui kanaliza informasaun liuhusi telemóvel, komputadór, internet no livru eletrónika-sira. Mídia forma ema ninia hahalok, influensia opiniaun públika no foti-desizaun. Coronel argumenta katak relata investigativu, ne'ebé iha kazu balun konsege hamonu prezidenti sira, no governu sira ne'ebé koruptu, transforma mídia sai instrumentu kontrolu ne'ebé efektivu no kredível, no hasae mídia ninia kredibilidade iha públika (Coronel 2016). Mídia to'o konsidera nudar forsa demokrátiku no ajente ba transformasaun.

Maske nune'e, iha kontekstu Timor-Leste nian entre tinan 1975-1999, mainstream mídia internasionál ezere knar ida ne'ebé duviduozu no halao knar duplu no kontraditória, independente no afavor ba poder polítika no ekonomia nasaun superpoténsia sira nian. Timor-Leste nudar nasaun ida ne'ebé ki'ik-oan liu no deskoñesidu iha época ne'ebá. Maske militar Indonézia sira invade ho brutalidade, nasaun ne'ebé ho populasau maizumenos 650,000 tinan 1974 ne'e, no ezekuta tiha jornalista laorai nain nen iha baliza Timor-Lorosa'e no Timor Loromonu nian, no iha Dili, no trajedia ida ne'e la hetan atensaun jornalista estranjeiru sira no mídia mainstream nian, to'o dala ida tan militar Indonézia sira masakre tan foinsae sira nain 200 inklui jornalista Nova Zelandia ida, Kamal Bamadhaj iha Santa Cruz, hafaok mak mundu tau atensaun ba lafaek Timor sira ninia mata-wen. Iha época ne'ebá 1991, pelumenos Timor-oan nain 200,000 mak lakon ona sira nia vida tanba funu, hamlaha no abandonu.

Artigu ida ne'e nudar revizaun badak ida ba knar mídia mainstream iha Estados Unidos Amérika konaba akontesementu sira iha Timor-Leste, durante período sira ne'ebé Timor-Leste iha okupasaun militar Indonézia nian. Dadus sira ne'ebé revela iha ne'e, barak-liu mai husi hakerek nain Mathew Jardin (anonym), no Edward S Herman (1998), no inklui mos narrativa Diplomata Senior José Ramos-Horta iha Funu: *Unfinished Saga of East Timor* (1996). Ami mos uza fonte sira google nian ne'ebé relevante ba

tópiku ida ne'e. Ba dahuluk autór apresenta artigu ida ne'e iha eventua seminár iha UNLIL 14 Novembru 2016 konaba "Polítika Estadus Unidus Amérika ba Timor-Leste: Perspektiva Mídia no Justisa Pós Masakre Santa Cruz 1991, hamutuk ho Jornalista Amerikanu Alan Nairn.

Ezekusaun Jornalista nain 6 ho Traisaun Mídia

Prezidente Gerard Ford no Sekretáriu Estadu Henry Kissinger lidera Estadus Unidus Amérika iha



tempu hafoin sira lakon funu iha Indo Xina (Laos, Vietnam no Cambodia) husi revolusaun komunista, maibé ejiste Suharto iha Indonézia no anti-komunista ASEAN ne'ebé maka fasilita husi interese bloku kapitalista Amerikanu. Momentu ne'ebá sira iha Jakarta bainhira Indonézia kompleta invade Timor-Leste iha 7 Dezembru 1975. Jornalista estranjeiru nain lima hetan ezejuta "oho" husi ema Indonézia-sira ne'ebé ho ideolojia direita iha fronteira Timor, no trai husi sira nia kolega jornalista-sira nomos mídia maioria, hodi labele lansa kampaña saida deit hodi fo sai konaba lialos "verdadeira" husi masakre ka asasinasaun ne'e. Informasaun konaba ne'e, sira rai ho segredu tebes

durante rejime terror Suharto nian. Jornalista estranjeiru nain 5 ne'e ho naran Greg Shackleton no Tony Steward husi Austrália, Gary Cunningham husi Nova Zelandia, Brian Peters no Malcolm Rennie Great Britain ne'ebé mak relata ativamentu konaba invazaun iha Balibo iha Novemberu 1975.

Roger East husi East Timor News Australia ne'ebé mak mai halo investigasaun ba jornalista lima ne'e, nia mos hetan oho husi Indonéziu-sira iha loron dahuluk invazaun, 7 Dezembru 1975, no ninia isin mate posivelmente soe hamutuk ho Timor-oan nain 50 iha portu. Maibé Australianu ida (1/22/1976) hakerek katak "Estadus Unidus hakarak mantein relasaun besik no amizade ho Indonézia. Ami respéitu Indonézia hanesan belun nasaun-non-aliñadu- nasaun ida ne'ebé ami halo bisnis barak liu ho (Jardim *Anónimo*)," ne'ebé klaramente nega justisa.

Mathew Jardim analiza no kompara oinsá informasaun-sira Timor nian taka iha mídia boot balun iha jornál Amérika: The Los Angeles Times, Chicago Tribune no Washington Post, durante tinan okupasaun nian no hafoin Jenerál Suharto monu. Iha tempu ne'ebá, iha deit mídia boot balun ne'ebé relata ka halo kobertura konaba Timor-Leste iha Australia no iha Estadus Unidus Amérika. The Los Angeles Times publika artigu 16 konaba Timor-Leste entre Agostu no Dezembru 1975, no iha ne'eba iha informasaun ho natureza relatóriu hamutuk 20. Entre 1976-Novembru 1978, Parlamentu Austrália relata asasinadu indiskriminadu iha

eskalaun ekstraordináriu, hasoru povu Timor-Leste, kompara ho história Gerra Mundiál II, The Los Angeles Times la-publika infórmasaun ka artigu ruma konaba ne'e. Artigu seluk husi jornál Chicago Tribune publika sesaun balun konaba Timor-Leste durante fulan 5 dahuluk tempu invazaun nian, no fulan 18 tuir, no la iha informasaun konaba Timor-Leste iha edisaun-sira tuir mai.

Jimmy Carter kontra Ted Kennedy iha kompetisaun prezidensiál 1976, no Carter susesu sai hanesan Prezidente Estados Unidos Amérika, líder ba bloku kapitalista osidentál. Estados Unidos Amérika no Japaun ofere se bilaun \$5 ba suporta ekonomia kada tinan ba Indonézia desde loron hahú invazaun, no Departamentu Estadu Amérika ofere se kuaze 9% ba armas hodi uza ba invazaun. Administrasaun Carter autoriza adisionál miliaun \$112 ba armas hodi fa'an ba Indonézia. Ne'e akontese durante Jimmy Carter nia administrasaun bainhira Indonézia hamonu bomba, mil masakre no kompletamente destroi baze rezisténsia RDTL nian iha fim 1978.

Ronald Reagan eleitu ba Prezidente iha 1984, no líder Timorenses sira hein katak situasaun sei at liu tan. Grupu suporta Timorenses hahú dezenvolve iha liña polítiku-sira iha nasaun ne'e atu mensiona Kongresista Harkin, Demokrátiku husi Iowa, Kongresista Anterior Donald Frazer, Paul Tsongs husi Demokrata Massachusetts no Senador Republikana Dave Durenberger husi Minnesota. Iha momentu ne'ebá mos

Administrador Apostóliku Timor Martinho da Costa Lopes ho ninia kontribusaun rasik, lao haleu keda Amérika hafoin nia sai husi rejime militar iha Timor-Leste tinan 1981, halao ninia jornada ba koalia haleu mundu inklui Estados Unidos Amérika. Washington Post dedika editoriál ida deit konaba Timor-Leste iha 1984, bainhira Sekretáriu Estadu George Schultz espresa prekupasaun konaba violasaun direitus umanus komete husi Indonézia. Maibé Washington Post la mensiona okupasaun brutal Indonéziu-sira no la koalia mos konaba Prezidente Reagan ninia asisténsia militar ba Indonézia. Chicago Tribune mos publika história ida badak los konaba Timor-Leste iha 1984.

Moru Belin naksobu, ne'ebé mak simbolikamente hakotu impase funu malirin. Iha 1991, membru parlamentu Portugés planu atu vizita Timor-Leste. Iha inísiu Indonézia simu ho pozitivu, tanbá intende atu revela progresu dezvoltamentu ba Portugés no ho objetivu atu konvense Delegasaun atu simu integrasaun hanesan fiar ida ne'ebé atinji tiha ona. Maibé Delegasaun Portugés lista Jill Jolliffee, jornalista Australiana ida no ema ne'ebé mak suporta Timor-Leste ninia luta ba independénsia. Grupu juventude pro-independénsia ne'ebé maka subar iha Igreja Motael hetan atake husi Mau-Hu sira (ajente lokal Indonéziu), no Mau-Hu Henrique ne'ebé maka hetan sona husi joven-sira no joven pro-independénsia Sebastião Gomes hetan tiru husi unidade militar, iha 28 Outubru 1991. Hafoin semana rua, iha 12 Novembru 1991 iha

masakre ne'ebé durante ne'e kuaze liuhusi 200 foin-sa'e protestador non-violentu sira ne'ebé maka simpatia ba joven Gomes hetan tiru no mate. Ida ne'e maka hakotu bensaun iha disfarsada. Jardim hateten katak matéria filme masakre ne'e lori-sai husi Timor-Leste, no ninia testemuña estranjeiru-sira mak hanesan Max Thal, Saskia, Allan Nairn no Amy Goodman, hodi mobiliza opiniaun públiku husi baze no obriga nasaun sira atu fo atensaun ba kestaun Timor-Leste nian. Nafatin menus relatóriu ka reportazen konaba Masakre Sta. Cruz, kompara ho protesta Tianament Square iha Xina 1989, iha Estados Unidos América. Iha tempu ne'ebá iha deit reportazen husi TV ida, CBS TV Network, konaba masakre iha 1991. Jornalista Charles Glass husi ABC News halo história ida hafoin fulan 10 Masakre iha 12 Setembru 1992.

Reportazen Falsu no Korretu

Maske reportazen husi média estranjeiru, sira sempre iha deskrisaun ne'ebé mak sala konaba Timor-Leste no Timor ninia kontekstu polítiku, erru sira ne'e hotu parte husi integrasaun média hanesan pro-status quo. Primeiru, sira deskreve Dili hanesan parte ida husi Indonézia; Segundu, autór-sira deskreve funu hanesan “funu sivíl” no “funu separatista”. Ida ne'e bebeik durante tinan 17 invazaun. Iha pós Masakre Sta. Cruz, média balun hahú tau intensaun no halo koresaun ba deskrisaun-sira. Jornál América nian hanesan Boston Globe, New York Times no Washington Post dedika tebes ba iha editoria, dezafia

retiramentu militar Indonézia no livre vota supervioziona husi Nasoens Unidas. Washington Post (12/05/1992) define Indonézia hanesan líder kolonialista Asian, seidauk mensiona mos konaba papél Estados Unidos América. Los Angeles Times hakerek katak, iha 1975 Estados Unidos kumprende pozisaun Indonézia nian, no komesa husi Estados Unidos ofere se asisténsia militar no ekonomia ba Indonézia, no hapara ka blokeia intervensaun efektivu saida deit konaba kestaun Timor-nian.

Prinsipálmene iha esforsu diplomátiku husi Delegasaun Eksterna Repúblika Demokrátika Timor-Leste (RDTL) partikularmente Diplomata José Ramos-Horta, no líder FRETILIN sira seluk, mudansa hirak ne'e akontese tanbá servisu makas husi Norman Chomsky, Allan Nairn, Amy Goodman no Amerikanu sira seluk, ne'ebé simpatia ba Timor. Sira harii ETAN (East Timor Action Network), grupu kampaña solidaridade ida iha Estados Unidos América no iha Canada, konsisten halo kampaña ba Timor-Leste nia ukun rasik an. Masakre Sta. Cruz hanesan testimonia evidénsia ekstraordináriu ba informasaun hotu, ne'ebé maka ofere se tiha ona ba polítiku-sira no média-sira Amerikanu. Iha ne'ebá sidadaun Irlandés balun harii mos grupu solidaridade seluk inklui East Timor Ireland Solidarity Campaign iha Irlândia, hafoin masakre. Ativista rejiaun Ázia nian ba dahuluk harii Asia Pacific Coalition for East Timor (APCET) 1994, hodi sobu baze apoiu rejime Suharto nian.

Maibé, iha jornál estranjeiru sira balun konaba Sta. Cruz eziste nafatin deskrisaun kontekstu ne'ebé lalos. Asosiasaun Mídia no mídia sira seluk sei mensiona “Dili iha Indonézia”, ne'ebé mak hatudu deskrisaun la akuradu. Iha ne'ebá mos mensiona katak soldadu-sira Indonézia nian nain 2000 mate iha Timor-Leste, maibé falla atu hateten sai konaba Timor-oan nain 200,000 mate kauza husi invazaun militár Indonéziu. ABC News Good Morning America (8/3/1999) hakerek “iha violentu ekstra-ordináriu husi movimentu Indonéziu iha ne'ebá, ho ema rihun atus mak mate (Jardim *anónimu*). Liafuan movimentu Indonéziu iha signifíkadu duplu, bele refere ba luta ba independéncia iha Timor-Leste hanesan movimentu separatista violentu internál entre indonézia. Violensia ne'e hanesan problema ukun rasik an ninian, laos brutalidade husi forsa invazaun no jenosida husi rejime ne'ebé mak problematiza iha mídia.

Reportazen konaba Suharto: Jenosidista Diak no At

New York Times, tuir Edward S Herman (1998), mídia komesa atu reporta história válidu hodi troka bias ideolójika sira. Jornal ne'e deskreve Suharto hanesan ditadór brutál iha tinan 32 nia laran kompara ho Pol Pot iha Cambodia. Maibé, Suharto ajuda interese jeopolítica Estados Unidos nian. Suharto transforma neutralidade Indonéziu iha funu malirin ba anti-komunista hodi oho-lakon kuaze 500,000 membru Partai Komunis Indonesia (PKI) entre 1965-66. Ida ne'e mak

halo ema hotu kontente ho mudansa iha Indonézia. New York Times aumenta katak Suharto transforma Indonézia ba paraísu investimentu iha mundu kapitalista.

Edward S Herman hakerek sesaun husi saida mak nia konsidera hanesan jenosidista diak no at, iha ne'ebé halo ita hanoin sé iha mundu maka ejiste jenosidista diak, no ninia deskrisaun maka hetan iha mídia mainstream no ne'e hanesan bias ekstra-ordináriu ida. Ida ne'e akontese iha Pol Pot, líder komunista Cambodia nian ne'ebé mate iha Abril 1998, no mídia iha momentu ne'ebé diak tebes hodi kompara fasista Ditadór Suharto no lider komunista Pol Pot iha Cambodia. Ida ne'e paradoksu.

Primeiru, maske Suharto halo masakre ba ema 500-700,000 inklui sira ne'ebé asiadu nudar inosente ho Partai Komunis Indonesia, mídia define nia hanesan jenosidista diak. Norman Chomsky bolu ida ne'e “terror konstrutivu”, iha ne'ebé Suharto governa ho terror ba iha interese aliadu poderozu sira. Suharto kometidu asasinatu masa hasoru Timorenses, maibé ne'e “terror benignu”, tanbá Suharto hanesan kliente ne'ebé diak husi patraun kapitalista sira iha Estados Unidos Amérika. Loron 2 Maiu 1981, iha New York Times publika artigu ida husi Henry Kamm, ema ida ne'ebé mak uza konseitu jenosida hodi define krime Suharto nian iha Timor-Leste.

Segundu, mídia deskreve Pol Pot hanesan ema at no diabu boot. Ne'e hetan iha Chicago Tribune (8/04/1998), no Washington Post (17/04/1998) temi Pol Pot “asasinu

masa”, “líder terror” no Pol Pot hanesan jenosidista ne’ebé at tebes. Suharto kometidu krimi hanesan iha Indonézia iha 1965 no iha Timor-Leste husi 1975-1998 iha tempu ne’ebá, maibé média la asosiadu jenosida ho Suharto. Iha deit maka opiniaun hakerek nain no karta-sira ne’ebé koalia konaba Suharto hanesan jenosidista ida.

Terseiru, iha fulan rezignasaun Suharto nian, média hanesan USA Today, The New York Times sei uza linguajen; Suharto hanesan ema ne’ebé koalia mamar, Prezidente in-eksplikável, Suharto hanesan ema ida ne’ebé iha espírito makas tebes, no Suharto hanesan ditadór reformasaun. Dalaruma média uza konseitu hanesan ditadór, autoritáriu maibé nunca uza asasinu masa. Sira refere liu ba iha Pol Pot maka hanesan ema ida asasinu masa, tanbá Pol Pot komunista ida. Média mos falla mensiona bomba Amérika nian ne’ebé maka kontribui ba oho ema 300-400,000 mate iha Cambodia, no sira mos ignora faktus katak Estados Unidos no nasaun kapitalista-sira oferece ajuda ekonomia, kilat no asisténsia militar ne’ebé maka boot ba rejime militar Indonézia, ne’ebé maka uza hodi ezekuta ka oho ema sivil Timor-nian maizumenos 200,000 resin.

Nota Final

Diskursu ida ne’e mai husi pedidu Vise Retór Relasaun Estudante, Andre da Costa Belo “L4” ne’ebé dedika ba ita, hanesan juventude, iha selebrasaun Masakre Sta.Cruz. Autór konklui artigu ida ne’e ho pontu sira hanesan tuir mai ne’e; Primeiru hafoin asasinatu

jornalista estranjeiru nain nen iha Balibo no iha Dili, rejime militar Indonézia mantein izola Timor-Leste husi mundu. Jornalista pro rejime militar Indonézia deit maka bele vizita Timor-Leste no sira nia reportazen suporta tebes rejime ne’e. Hanesan Prezidente Taur Matan Ruak hateten iha selebrasaun 12 Novembru 2016, iha tempu ne’ebá forsa Indonéziu sira kometidu masakre barak tebes hahú kedas iha 1975, maibé Masakre Sta. Cruz deit maka halo mundu tomak hatene, tanbá prezensa husi jornalista estranjeiru-sira: Allan Nairn, Saskia, Amy Goodman no Max Thal.

Segundu, juventude ne’ebé maka luta no mate hahú husi 1975, hanesan mehi nain ba sira nia tempu. Sira rasik esperiénsia opresaun, mehi ba mundu ne’ebé diak liu, luta no mate iha opresor sira-nia liman. Juventude-sira agora mos iha esperiénsia ho forma diferente husi opresaun no injustisa. Ritmu husi knananuk Timorensé hakerek husi José António ‘Jeto’ no hananu husi Amandio Araújo haktuir versaun sira hanesan “Dame Rohan Laek” hateten: “Hau hakarak kaer ba fitun, maibé lolo liman la to’o, hau hakarak semo as tebes, maibé susar liras la naruk,..Tansá rai ne’e la iha justisa, balu riku balu kiak, balu moris terus no susar, seluk diak ho ema nia kolen....Rai ne’e nia moris, oinsá los, la fo diak ba ema hotu..iha deit odiu no laran moras, domin dame folin laek...”. Ema balun hateten katak, joven-sira baruk ten no servisu la iha, hanesan mos kolonialista-sira hateten ba o nia inan-aman sira. Hau husu ba o agora: tanbasá o baruk? Tanbasá o servisu la iha? Ohin laos

aban, maibé ohin ba o atu hamriik no halo mudansa. O mak istoriadór, o laos tuir deit história!

Terseiru, tinan 25 hafoin Masakre Sta. Cruz: Indonézia halo mudansa ruma? Amérika halo mudansa ba diak liu tan? Iha mudansa iha ne'ebá, maibé kontinua prezerva status quo. Donald Trump husi Republikanu eleitu ba Prezidente Estadus Unidus Amérika, no status quo fila-fali mai iha Amérika. Indianu nativu-sira luta ba asesu Projetu Pipeline liuhusi Mota Missuari iha Dakota Norte ne'ebé mak ameasa ba polusaun bee hemu no destroi ekolojia. Sira nia marsa atu fo hanoin ita konaba espíritu makas husi Ta Shunka Witco (Crazy Horse Rider), comunidade Indianu ne'ebé maka luta hasoru kolonialista-sira iha sira-nia rain, luta, no asasinatu iha tinan 200 liuba. Allan Nairn no Amy Goodman no sira seluk iha Amérika ne'ebé maka lakohi fahe sira nia opiniaun ho sira nia governu no korporatizmu iha mília iha Amérika. Realidade sira hateten sai krimi ne'ebé kometidu husi Amérikanu liuhusi Jenerál Indonézia-nian, no hamrik ba demokrasia lolos iha Amérika. Amy Goodman foin lalais detein husi Polísia iha Dakota tanbá ninia reportazen ne'ebé manifesta aktu-sira iha Dakota. Sira maka símbólu ba solidaridade entre ema iha kontinentál-sira iha mundu. Joven-sira, agora imi nia tempu atu hatutan luta ne'e ba mundu tomak. Mai kontinua no muda mundu ba ida ne'ebé diak liu!

Bibliografia

1. Coronel, Sheila S (2016), The role of Media in deepening Democracy.
2. Herman, E.S (1998), Good and Bad Genocide: Double standards in coverage of Suharto and Pol Pot, Accessed: <http://fair.org/extra/good-and-bad-genocide/>.
3. Jardine, Mathew (1993), East Timor: Media Turned Their Backs on Genocide, accessed: <http://fair.org/extra/east-timor-media-turned-their-backs-on-genocide/>.
4. Kohen, A.S (1999), From the place of the dead: the epic of struggles of Bishop Belo of East Timor, St. Martin's Press, New York.
5. Lenox, Rowena (2000), Fighting spirit of East Timor: The life of Martinho da Costa Lopes, Pluto Press, Australia.
6. Nairn, A and Goodman, A (1993), Massacre: the story of East Timor, USA.
7. Ramos-Horta, Jose (1996), Funu: the Unfinished Saga of East Timor, The Sea Press Inc, Eritrea.
8. Mass Media; http://ffmgu.ru/images/c/c6/MASS_MEDIA.pdf.

História no Nasaun: Dekoloniza

História Timor

Autór: Fernando Ximenes

**“Descolonizar para
independência é lógico;
mas, decolonizar para
colonizar de novo é simplesmente
um contra-senso, um absurdo”**

**Nicolau dos Reis Lobato,
1975**

**Nicolau dos Reis Lobato
lutou por um processo justo e
clarividente da decolonização,
e colocou ao seu lado uma
revolta metafísica.**

Pe. Martinho Gusmão, 2018

Katak saida los mak história Timor-Leste, tuir nia sentidu ba ema Timor-oan hanesan nasaun ida. Hanesan nasaun, Timor ne'e iha história ka lae? Timor nia história sé los mak hahú, no parte ne'ebé los mak dudu prosesu história nasionál ne'e lori to'o ba iha formasaun nasaun ida. Pergunta baibain, maibé bele hamosu tensaun.

Bele haree no rona bebeik Timor-oan halerik kona-ba história interpretasaun pasadu Timor nian ne'ebé barak liu hakerek husi erudite burokrátiku no ofisiál militar koloniál no ema-lao rai sira. Testu hanesan 'Cadernos Coloniais' hamutuk hitu-nulu (70), iha lima (5) mak hakerek kona-ba Timor iha período Salazar, representa diskursu poder, kuñesimentu, história no estilu testu koloniál nian maske hakerek husi ema socialista, azilu polítika hanesan Paulo Braga.²

² Cohn da Silveira, A. (2018). O Timor Português em Foco: A Construção do

Hakerek balun fo deskrisaun ho matan iha klaran no la ezotizmu kona-ba kultura no perspetiva história Timor nian. Bele nota iha obra sira hanesan Frederic Durand nia *História Timor-Leste Nian*, istoriografu nasionalista hanesan Fernando Sylvan nia poeta sira ho Abilio Araújo nia livru *Timor-Leste, Os lorriscos voltaram a cantar*. Bele mos nota iha poezia no estudu sientífiku sira husi Ruy Cinatti³ ne'ebé bele konsidera nudar kahur husi literatura Timorensen ho literatura Timor hodi fo apresiasaun testu hakerek kona-ba identidade, história no realidade Timor ida luan.⁴ Tinan hirak liu ba, dizertasaun krítiku husi Daniel de Lucca ho tema *A Timorização do Passado* fo atensaun ba oinsá atu haree produsaun kuñesimentu história iha lensa Timor nian. Tan ne'e, iha ona literatura romantista, novela, autobiografia, poezia fantazia anti-koloniál no fiksaun sientífiku barak tebes mak hakerek ona kona-ba Timor.

Discurso do Poder nas Imagens e Textos dos “Cadernos coloniais”. *Revista Virtual de Letras*, nº 01.

³ Haknaar dauluk nudar Xefi Gabinete ba Governador Oscar Ruas iha Timor Portuguese. Tan deit nia obra hakerek sira, Ruy Cinatti mos hetan bandu husi Governu Salazar bebeik hodi labele tama ba Timor. Hare'e Centro Juvenil Padre António Vieira, “Ao Timorensen Meu Amigo – Ruy Cinatti e Timor.” Colóquiou, Dili, 24-25 Junho 2002.

⁴ Da Costa, L. (2012). *Metáforas de Mosaico: Timor-Leste em Ruy Cinatti e Luis Cardoso*. Teze(Doutoradu) iha Universidade de São Paulo, p. 16.

Iha jerál, dekoloniza história preokupa ba problema hanesan: (i) Livru no kuñesimentu ba história aserta bebeik ho prezensa Portugés; (ii) Periodu pre-koloniál foin bele deit komprende liuhusi esplikasaun no deskrisaun antropólogo ho etnolinguístiku sira, no história ema Timor nian iha tempu ne'e klot, nakukun, rungu-ranga no diskonekta; (iii) Narrativa boot no dominante mak papél Portugés no sira nia diresaun história no objetivu koloniál; (iv) Lokalizaun história lao tuir deit orientasaun fronteira kulturál, lian, relijiaun no polítika husi Timor ida kontemporanu; no ikus mak, (v) História Timor dalabarak uza liu métodu fatuál ho dokumentáriu ne'ebé depende liu ba arkivu imperiál hodi ba hatene pasadu, maske bele mos la los, konsepsaun sala-dalan, no jeneraliza kona-ba Timor.

Artigu ne'e tuir literatura kritisismu ba dominasaun diskursu kultura Osidentalismu nian. Artigu historiografia ne'e analiza no interpreta história, nasaun, kultura, ho literatura iha ritmu ho Osidentalismu, kolonialismu, imperialismu no modernismu. Iha argumentu no diskusaun nia laran, laos intende tomak atu fo mata-dalan ka métodu ba dekoloniza história rasik.⁵ Maibé oinsá mak bele fo

perspetiva literatura, no eslika diskursu história, testu, matenek ne'ebé kruza malu ho forsa esterna, prezensa kultura represivu no dominasaun ideia no kuñesimentu husi kolonialismu no imperialismu Portugés, habadak refere ba história Eurosentrismu.⁶

Tan nunee, artigu ne'e eslika liu deit problema iha kuñesimentu eurosentriku husi aspeitu tolu ne'ebé ezisti iha produsaun história, memória no kuñesimentu kona-ba Timor no ninia história. Pontu tolu mak tuir mai: (i) produsaun ba kanál história Timor nian; (ii) fonte ba história hodi dekoloniza iha sosiedade ho tradisaun orál; no (iii) mak lian hanesan poder ida iha história no formasaun ba nasaun ida nian. Asuntu tolu ne'e, ho objetivu atu haree dekoloniza história nasaun Timor ne'e husi perspetiva ida luan.

Difusionismu no Kanál História Timor nian

Iha sékulu ida liu ba, Oswald Spengler, Filózofu no Istoriador Alemaña, ho kítika deskreve sai katak, 'história mundiál ne'e ita (Osidente) nia imajen mundiál, no laos ema moris hotu nian' - los duni katak, 'lay-out husi história mundiál hanesan período antigu, *medieval* no modernu nudar nosaun subjektivu

⁵ Kona-ba metodu sira, ba hare'e kedas iha Edward Said nia metodolojia ne'ebe nia eslika no uza ba defeza iha *Orientalism*(1978) ho *Beginnings* (1975); Linda Smith nia obra *Decolonizing Methodologies*(1999); Ikus liu, ba hare'e metodu hanesan 'dirkursu, subjektividade, liberdade no nia etika' sira iha Obra

Michel Foucault, ka radikal liu ba haree 'fenomenolojia' iha Edmund Husserl.

⁶ Iha artigu ne'e, duke haree ba Portuges hanesan kolonialista Osidental ketak ida, maibe oinsa mak bele hare'e Portuges nudar partikel iha sistema no istoria integradu Osidentalismu, no ho sira nia pozisaun tomak iha mundu, liuliu ho Timor.

ne'ebé husik hela husi jersaun ba jersaun.⁷

Krítiku liu, James Blaut, deskreve katak, história mundiál iha nia kanál istorikál (*historical tunnel*) ne'ebé deriji katak, iha mundu ne'e iha 'sentru jeográfiku permanente ba história ho sivilizasaun ida deit, no ne'e mak Europa.' Europa deit mak 'progresu, inventa no inova' liu, maibe non-Europeia sira hein simu, tolan no halo-tuir deit. Non-European sira mesak estagnadu, tradicionalístiku, barbarian, inferior, beik no seluk-seluk tan. História kona-ba sidade-estadu, to'o ba impériu, governánsia, burokrásia no lei, agrikultura, urbanizasaun, relijiaun, siénsia, teknolojia, to'o ba sivilizasaun, ne'e hotu komesa, akontese no orijin iha 'rai biblia (*bible land*)' no Europa deit. Hafoin ne'e mak daet ba rejiaun seluk iha mundu.⁸ Ho badak, ida ne'e mak estilu história 'Eurosentrismu' no dominasaun '*historical tunnel*' ne'ebé representa deit Europeu (Osidentál) sira modelu ba história mundiál. Hanesan mos iha Timor, durante ne'e, rekordasaun dokumentu dehan deit história Timor hahú ho prezensa Portugés nian iha Lifau. Kontatu ho autór sai husi Illa Timor hanesan Xina, Majapahit sei oitoan.

História Timor, sempre hahú ho kontatu ba reinu sira iha parte sentrá, hanesan Sonbai, Wewiku ho

Wehali. Hafoin atividade misionáriu ho komérsiu lao makas ona, hahú konta ona Reinu Costa, Hornay, Topasse sira iha Larantuka no hirak ne'ebé rabat ba administrasaun koloniál nian iha Lifau. Tan ne'e, história Timor, hahú husi Sentru Norte Illa Timor, hafoin ne'e mak daet ba parte seluk. Ne'e bele haree iha mapa dezeña husi António Pigafetta iha 1512 ne'ebé mak indika deit Suai, Lichsana, Oebich no Canabaza iha Illa Timor, maske reinu balun ezisti ona hanesan Luca. Konsekuensia mak rekordasaun história iha parte seluk nian nakukun, diskonekta no mosu lakuna.

Imajinasaun ba história, halo Timor oan balun rasik, dalaruma konsidera Portugés mak lori sivilizasaun, salvaun mai Timor no halo nia sai nasaun. Maibé problema mak, objetivu no direasaun história koloniál sulin lemo-lemo no justifika liuhusi hahalok ne'ebé bolu 'misaun sivilizasaun.' Iha deit preámbulu (*Estatuto Orgânico das Missões Católicas Portuguesas de África e Timor*) tinan 1926 mensiona katak kuaze 'klamar' 8.500.000 mak ezisti iha teritóriu koloniál Portugés nian tomak – dekretu ne'e aponta mos katak Portugés iha 'dever soberanu' no 'absoluta' hodi bele 'hanorin' ka 'siviliza' ema sira ne'e hotu ba iha moris 'progresu sosiál'.⁹

Memória no produsaun kuñesimentu história durante ne'e

⁷ Spengler, O. (1926). *The Decline of the West: Form and Actuality*. New York:

Alfred A. Knopf, p. 15-16.

⁸ Blaut, J.M. (1993). *The Colonizer's Model of the World: Geographical Diffusionism and Eurocentric History*. New York: The Guilford Press, p. 3-17.

⁹ *Estatuto Orgânico das Missões Católicas Portuguesas de África e Timor*, Decree 12 485 of 13 October, reproduz iha Diário da República Eletrónico. p. 1536.

hatudu Timor hanesan rai ne'ebé laiha história, laiha poder soberanu ida mak atu ukun no laiha nain ba rai Timor laran ka *terra nullius*. Kolonialista fiar katak, Timor laiha ukun polítika, laiha orden, laiha história, la sivilizadu, no presiza salvasaun, disiplina, no moderniza. Tan ne'e mak Portugál fo nia lian, fo nia modelu administrasaun polítika, fo nia lei, fo nia kultural nsst.

Uluk liu ba, bele refleta husi Padre Saserdote Lejendáriu John (Presbyter Johannes) nia karta ne'ebé iha nia 'importánsia desisivu ba expansaun Oeste nia Kristaun ba iha Oriente' – nia karta hetan diskusaun husi exploradór-sira hanesan Pian del Carpine, William of Rubruck, ho Marco Polo - maibé lolos, karta ne'e rasik hanesan 'dokumentu propaganda anti-Bizantinu,' iha ne'ebé 'fantazia jeográfika ne'e neneik-neneik fila jere tiha ba projetu polítika:' ne'e mak expansaun emamutin Europeu, Kristianismu no Osidentalismu. Karta ne'e to'o ba iha Oeste iha sékulu sanulu-resin-rua, no deskreve kona-ba rai ne'ebé hakur sai husi Musulmanu nia teritóriu sira ne'e bele deit parte ba reinu Kristaun nian. Razaun ne'e mak justifika jornada ba 'expansaun no explorasaun' ne'ebé ikus liu lori to'o ba kolonizasaun Ázia, África no seluk-seluk tan.¹⁰

Nia konsekuensia bele lori ba saida mak Ngũgĩ wa Thiong'o bolu prátika '*dismembering*' iha ne'ebé, kolonialista hakotu tiha kolonizadu

husi sira nia 'memória antigü' no troka ho memória Europeu nian deit. Troka naran, rai, no kuda tiha memória Europeu iha kolonizadu nia isin, hanoin no ikus mai identidade. Ema nia naran lisan konsidera hanesan naran jentiu (la sarani/la sivilizadu), fiar toteisme dehan forsa at/nakukun signifika (la sarani no la sivilizadu).

Sorin seluk, bele nota diak história eskruzivu to'o deit agora. Biblioteka iha ensinu báziku to'o fali universidade iha Timor menus tebes ho literatura Timor, katak literatura ne'ebé hakerek kona-ba Timor husi ema Timor rasik. Testu ba hanorin história, dedika ba história Timor nian menus tebes. Departamentu História, Sosiolojia, Antropolojia la mosu iha kada universidade. Iha 'Manuál História' ne'ebé serve ba matéria didátiku ho apoiu husi Universidade de Aveiro, Portugál, eis rai-nain, husi volume tolu ho total pájina 500, maibé konsiste husi pájina hamutuk 140 deit mak dedika ba história Timor.¹¹

Ho nune'e, atu komprende diak kona-ba Timor, hanesan James Fox (2003) dehan, presiza tebes perspetiva tomak¹² no luan, husi pontudevista materialismu hanesan jeolojia, ekonomia, ka história orál, história kulturál, psikolojia, história família ka mitolojia, liuliu saida mak J.G.A. Pocock defende lolos kona-ba

¹⁰ Eco, U. (1998). *Serendipities: Language and Lunacy*. New York: Columbia University Press, p. 8-9.

¹¹ De Lucca, D. (2016). *A Timorização do Passado: Nação, imaginação e produção da história em Timor-Leste*. Teze(Doutorado), Instituto da Filosofia e Ciências Humanas, Universidade Estadual de Campinas, p. 45.

¹² Fox, J. 2003, *Out of Ashes*, p. 1-2

'História Filozofikál' ne'ebé reprezenta ánglu oin-oin. Sorin seluk mos, tanbá história iha ema Timor nia matan, insiste ba iha história "Pan-Timor"¹³ ka Timor ida deit.

História Timoriana no Lian Portugés: Identidade Nasaun Saida?

Iha *Fronteira história* ema nian iha mundu mosu buat rua hanesan 'história natureza' no 'história ema'. Rua ne'e lahanesan ba malu. Iha 'natureza' asosia ho baze ereditáriu' ka biolójiku, nudar *unhistorical history*, maibé 'história ema' nian asosia ba 'tradisaun' ne'ebé tradisaun ema nian rasik 'bele lakon, repete hikás,' maibé história tradisaun 'halo ita sai ema, distingui, no iha substánsia istorikál'.¹⁴

Nicholas Ostler (2005) aserta katak, "história lingua nia perspetiva ba história ema nian - kontradis tebes ho perspetiva história jenética ema nian."¹⁵ Komunidade linguajen nudar "unidade naturál." Ne'e hatudu

katak populasaun mundu agora bele deit konsiste husi ema liu rihun nen tuir grupu comunidade lian nian. Maske lian ne'e "imortál" maibé la signifika nia "sobrevive" rohan laek.¹⁶ Bele haree lian sira ne'ebé koalia iha Simeria antigu, ka lian Lovaia iha Lospalos ne'ebé atu 'mate'.¹⁷ Tan ne'e, comunidade lian Tetun ho comunidade lian Portugés, nudar grupu kiik ne'ebé la hanesan entre sira iha comunidade rihun nen resin ne'e. Liu husi lian, bele hatene oinsá transformasaun ba sociedade ida mosu no fahe comunidade sira.

Hafoin impériu Romanu monu, lian Latina la sai tan lingua franka ba Europeu sira. Iha kazu Timor, destruisaun sentru lian Tetun iha Reinu Wehali husi Portugés ho Topasse,¹⁸ laos fin ba Tetun hodi evolui sai nudar lian Franka. Hanesan antropólogo kulturál Alesandro Bicca dehan, Tetun-Terik, nudar lian ida 'lulik' no uza deit husi lia-nain ho ema riku sira iha Bellu. Biar Wehali monu, maibé lian Tetun-Terik kontinua espalla, no simu iha fatin barak iha Timor. Posibilidade liuhusi Luca nia asensaun, ne'ebé mak rekoñese no simu-an nudar sentru poder kulturál iha provinsia Bellu hafoin Wehali.¹⁹

¹³ Molnar, A. K. (2010). *Timor-Leste: Politics, history and culture*. New York: Routledge, p. 33.

¹⁴ Jaspers, K. (1953). *The Origin and Goal of History*. New Haven ho London: Yale University Press, p. 235-237.

¹⁵ Bainhira haree husi perspektiva jenetika, maka, comunidade etnojiku Melanezia mak halo uluk povoasaun kuaze tinan 42.000 liu ba, tuir fali ho Austronezia sira iha tinan 4.500 liu ba. Antropologu balun dehan katak, comunidade rua ne'e tama mai no halo funu ho ema Aborijin iha illa Timor. Tan ne'e, peskiza nee rekonese oinsa nasaun moris, liu husi perspektiva istoria lian nian.

¹⁶ Ostler, N. (2005). *Empires of the World: A Language History of the World*. New York: HarperCollins, p. 3.

¹⁷ Haree karater oinsa lingua ida mate iha Crystal, D. (2000). *Language Death*. Cambridge: Cambridge University Press. Lingua nia mate hatene liu ho 'Linguicide' ka masakre linguajem nian.

¹⁸ Molnar, A.K, *Timor-Leste*, p. 28.

¹⁹ Hare'e Filipe X. Belo (2013); Barnes et.al. (2017). Sukat husi esperiensia

Tan ne'e, iha possibilidade laos deit evanjelizasaun mak halekar Tetun, maibé Luca mos kontribui ba nasionalizasaun lian Tetun no dudu prosesu ba harii sensu identifikasaun entre ema Timor, liuhusi lia-dadoli, troka ideia no diálogo ka kontaktu entre ema-lao-rai, lia-nain no comunidade iha jerál. To'o agora deit mos, atu hamoris no harii hikas uma-lulik balun iha Timor laran, ka David Hicks bolu 'resurjénsia kostume',²⁰ maka prezisa tebes prezensa no rekoñesimentu husi lia-nain sira husi Luca.

Tan ne'e, husi kedas Luca to'o mai iha luta kontra Indonézia, nudar período ba haklaken lian Tetun, no comunidade Tetun sira fahe história komún no koletivu. História comunidade lian Portugés fahe nia história no memória koletivu ho comunidade lian Tetun, iha sírkulu kolonialismu Portugés no rekolonizasaun Indonézia, ne'ebé dahuluk liuhusi atividade misionáriu no komérsiu nian. Tanba Bicca, espekula katak, durante tinan 400 nia laran, lian Portugés koalia deit husi ema pursentu sanulu (10%). Durante okupasaun Indonézia, Timor-oan sira hili Portugés ba nesesidade

rezisténsia. Bainhira ukun-an, maka ho objetivu atu distingui an ketak husi kultura Javanés-Indonézia deit, maibé laos ema hotu koalia Portugés durante rezisténsia no hafoin independénsia.

Ho razaun ne'e fo hanoin hela mai katak, comunidade ida lian Portugés laos fatór ne'ebé sentrál iha prosesu totál história nasaun no konstrusaun nasaun Timor nian. Maibé hola parte nudar elementu iha prosesu evolusaun no transformasaun história nasaun nian, ne'ebé ikus mai *imajina* nudar nasaun-estadu Timor-Leste. Kultura no história saida mak futu hamutuk comunidade Lian Tetun ho lian Portugés, karik laos kolonialismu, imperialismu, Osidentalismu no mos modernismu? Biar habelun malu Portugés-Tetun, maibé buat rua ne'e nudar produktu história ne'ebé kontinua iha tensaun kulturál. Lian Tetun hatudu kazu asimiliasaun kultura ne'ebé lori to'o ba koezisténsia no ko-mistura entre Tetun ho Portugés iha literatura Timor no diskursu lian Tetun, maibé ho sentidu inbalansu, asertivu no ejemóniku.

Tan ne'e, dekoloniza história iha orden lian, katak, oinsá los mak prosesu '*inward history*' iha konstrusaun nasaun Timoriana ne'e lao. Iha ne'e, dekoloniza história haree ba oinsá, comunidade lian Tetun ne'e hahú ho comunidade kiik, bele espalla ba fatin barak, no afeta ba sensu identifikasaun entre ema Timor, liuhusi prosesu história kulturál. Imajina, sé karik laiha kolonialismu, direasaun história hahú ho poder reinu boot tolu hanesan Sonbai, Webiku ho Wehali forma

personal, Antonio Aitahan Matak, emalisan ida husi jerasaun reino Luca, mos haktuir katak, Luca iha nia influensia kultural no ritual ne'ebe espalla iha illa Timor mos. Nia rasik mos hatete mai autor katak, nia fo partisipa iha prosesu harii hikas uma-lulik kuaze 74, balun iha Kupang mos.

²⁰ Hicks, D. (2007) 'Community and Nation-State in East Timor'. *Anthropology Today*, vol. 23, 1, pp. 12-16.

tiha ukun laos deit rituál, maibé polítika ne'ebé formalístiku²¹ hodi governa tomak Illa Timor, maka 'integrasaun kultural'²² bele lori to'o ba iha sivilizasaun boot ida.²³ Tan nune'e, reklama lian Portugés nudar identidade fundamentál Timoriana iha nia limitasaun ka sentidu pontudevista temporál deit, tantu husi parte história rasik, maibé mos kona-ba nia validu no poder agora

²¹ Iha I Konferensia Memoria e Identidade. Orador Aurelio Guterres, refere Bellu mak sentru ba konfederasaun ba ukun iha lidun Lorosa'e illa Timor nian.

²² Ema iha Sudueste Aziatiku organiza ho forma 'integrasaun kultural duke sentralismu politika.' Konseitu nee hodi responde deit ba bias Osidental nian. neebe barak liu deskreve kona-ba ema sira iha Suduete Aziatiku. Haree Hall, K. (2011). *A History of Early Southeast Asia: Maritime Trade and Societal Development, 100-1500*. United Kingdom: Rowman & Littlefield Publishers, Inc. p. 2.

²³ Biar nune'e, Antonio Ai-Tahan Matak, vetaranu, ema-lisan no istoriador lokal, haktuir mai autor katak, "tuir lolos molok Portuges sira kontatu no koloniza Timor, ita ne'e nasaun ona." Matak haktuir nune'e refleta ba saida mak ohin Kenneth Hall dehan kona-ba 'integrasaun kultural' ka 'inter-tribal' no 'nasionalismu espiritual' ka 'autoridade espiritual' iha Traube. Tamba Matak konta mai katak: reinu Luca laos komesa bo'ot bainhira Wehali monu hanesan argumenta ona iha Hans Hagerdal. Maibe Luca nia lisan ne'ebe bolu 'Webiksa-Likisan' nudar lisan ne'ebe fahe tiha ukun ka autoridade ereditaria familia ba oin-haat(4) iha illa Timor. Sira mak 'Sonbai - Afo-oansila; Webiku; Wehali; no Camenasa.

ne'ebé konkretu hodi domina iha sosiedade Timoriana.

Fonte História Oral no Lian Ema-Lisan:²⁴ Forma no Atualidade

Dokumentu arkivu sira ne'ebé hakerek husi ajente koloniál, bele deit hakerek iha kondisaun ne'ebé sira nia kuñesimentu rasik 'la sistematika no inserteza,' ho nune'e, bainhira soi hamutuk analiza klean no momos ba 'tone, temper ho epistemolojia' maka bele mos hetan 'perturbasaun konseptuál no polítika'²⁵ iha dokumentu no testu koloniál sira. Ne'e hatudu, diskursu koloniál ne'ebé mosu iha testu la asegura realidade ida lolos, la luan, maibé mosu mos bias no estilu hakerek no hanoïn deskriptivu ne'ebé subjektivu tebes ho interese koloniál nian. Iha história dokumentáriu sira ne'ebé rai hela iha arkivu koloniál bele mos lori ba iha forma representasaun naksalak.²⁶ Biar

²⁴ Ema-lisan, autor refere ba definisaun neebe antropologu David Hicks esplika. Klaru liu haree Hicks, D. (2013). Adat and the nation-state : opposition and synthesis in two political cultures. Iha Michael Leach, ho Damien Kingsbury (Eds.), *The politics of Timor-Leste : democratic consolidation after intervention*. Ithaca, New York : Cornell University, Southeast Asia Program.

²⁵ Stoler, A. L. (2012). 'In Cold Blood: Hierarchies of Credibility and the Politics of Colonial Narrative.' Iha Ricardo Roque no Kim Wagner (Eds), *Engaging Colonial Knowledge: Reading European Archives in World History*. UK: Palgrave Macmillan, p. 35.

²⁶ Davies, N. (1997). *Europe: A History*. London: Plimlico Random House, p. 7. : Seluk, Ricardo Roque nota katak,

nune'e, labele atu hases hotu kedas no jeneraliza kona-ba prekonsepsaun Eurosentriku ne'ebé mosu iha testu koloniál nia laran. Maibé bele rezolve difikuldade sira husi konseptuál no teoritikál balun ne'ebé bele lori ba iha komprensaun boot.²⁷

Fila mai ne'e, forma história barak kona-ba orijin kultura, identidade no moris mantein liuhusi história ai-knanoik, ka mitu no hatúr liuhusi interkoneksaun entre lia-nain no ibun-ba-ibun husi 'ema-lisan' sira. Maske nune'e, barak mak konsidera ai-knanoik, ho mitu nudar narrativa nasaun ne'ebé iha koerensia narrativa hodi forma identidade nasional Timor.²⁸ Iha ai-knanoik jerál oin tolu kona-ba fundasaun no orijin Timor, hanesan 'lafaek boot' ne'ebé forma sai tiha Illa Timor; orijin ema mai husi

liur; nomos Timor nudar 'sentru mundu' nian.²⁹

Maske história no fonte orál ikus-ikus ne'e uza atu rezolve 'injustisa istorikál' ne'ebé hamosu husi kolonialismu, to'o ba kompara no kestiona arkivu koloniál, maka aprosimasaun ne'e rasik mos sei nafatin preokupa husi akademista história ba iha nia 'kredibilidade no akurasaun'.³⁰

Problema mak, atu nafatin depende ba formatu testuál ne'ebé hakerek husi "erudite-burokrátiku ho antropolojista"³¹ Portugés hodi bele lori ba figura pasadu, maske sei la garante realidade ida lolos, ezisténsia absoluta no representativu liuhusi deit testu ida nia evidénsia? Tan nune'e, importante tebes liu kona-ba komprensaun ba realidade pasadu liuhusi obra hakerek ne'ebé iha ona, tanbá deit Timor oan sira laiha lisan hakerek rasik, maka atu halo krítika ba testu ne'ebé hakerek ona husi Portugés sira, haree liu ba "style, figure of speech, setting, narrative devices, historical and social circumstance," laos deit "correctness of

violensia "kasa-ulun" mosu iha istoria kolonial kondena deit katak Timor oan sira mak komete asaun nee ba malu, maske nune'e, iha nia 'Entangled with Othernes' dehan katak, ofisial militar Portugés sira laos deit observa, deskreve maibe mos involve iha pratika 'barbarian' ne'ebe dalabarak refere deit ba Timor indijeni sira.

²⁷ Pennock, C. D. (2012). Insights From the Ancient Word: The Use of Colonial Sources in the Study of Aztec Society, iha Roque, R. ho Wagner, K. A. (Eds) *Engaging Colonial Knowledge: Reading European Archives in World History*. UK: Palgrave Macmillan, p. 117-118.

²⁸ Paulino, V. (2014). Os média e a afirmação da identidade cultural Timorenses. Iha Paulino, V. (Ed) *Timor-Leste nos Estudos Interdisciplinares*. Dili: UPDC-PPGP, UNTL, p. 133-150.

²⁹ Durand, F. (2009). *História de Timor-Leste: Da Pre-História A Actualidade*. Lisboa: Lidel – Edicoes Tecnicas, Lda, p. 17-18.

³⁰ Nugent, M. (2017). Entanglement of Oral Sources and Colonial Records. Iha Kirsty Reid ho Fiona Paisley (Eds), *Sources and Methods in Histories of Colonialism: Approaching the Imperial Archive*. New York: Routledge, p. 160.

³¹ Haree Kammen, Douglas (2016) *Three Centuries of Conflict in East Timor*. NUS Press: Singapore. p. 23

*the representation nor its fidelity to some great original.*³²

Momos hatudu katak, Timoriana sei mantein no laiha transformasaun radikál iha “époka mitológiku (*mythological age*)”³³ ka saida mak Josh Trindade populariza ho naran ‘tempu rai-diak’,³⁴ no Fernando Sylvan bolu ‘*tempo teimoso*’³⁵ no seluk, Vico Giambattista refere “era barbarian”. Maibé, Portugés iha ona faze “história umana” hanesan saida mak mosu iha narrativa história mundu nian (Campbell 2004). Klaru ida ne’e bele sai ona problema formasaun história, espásiu temporál la hanesan nomos konfigurasau jerál iha realidade ema Timor ho sira seluk nian.

Biar nune’e, ema iha tempu primitivu nia fiar ho kuñesimentu bele primitivu tuir dezignasaun Europeu sira, maibé hanesan Vico formula ‘teoria narrativu koerente’ (*coherent narrative*) katak ‘kada período fahe nia lingua, relijiaun,

lójika, siénsia nsst,’ ne’ebé ‘komún no apropiadu.’ Tan ne’e, ‘tempu primitivu prodúz kuñesimentu primitivu.’³⁶ Iha ne’ebé, kuñesimentu sira ne’e fornese valór, julgamentu, opsaun estandar no valór aseitável, ka tradisaun ne’ebé iha poder, fiar no lejitimidade atu ukun.

Ida ne’ebé mak makas no ne’ebé mak fraku, boot liu, no kiik liu? Saida mak ita atu deskreve kona-ba instituisaun edukasionál iha Timor antiga hodi kompara ho akadémia iha Gregu antigu ho Confucius iha Xina antigu. Aztec sira rekorda no transmiti sira nia ‘valór no história husi kultura orál no vizuál’ inklui mos ‘dokumentu piktoral’ sira. Hahú kolonizasaun, forma komunikasaun hodi tatoli ideia, fiar no sentidu halo liuhusi deit vokabuláriu *pictographic*. Sé la konsidera lia-nain ne’ebé sai protetór ba uma-adat, ne’ebé mak fo lejitimidade ba liurai ida nia ukun, no ne’ebé mak sempre rai-netik hela memória no kuñesimentu sosiedade nian? Sira nia matenek mak bele konstitui iha elementu esensial kiik ne’ebé karakteriza ka bukae importante ida iha elementu sira ne’ebé temik iha James Scott nia *hidden transcripts*?³⁷

Ema Timor domina ho modelu literatura orál, no lian ema

³² Said, E. (1979). *Orientalism*. New York: Vintage Book, p. 21

³³ *Mythological age* mos inspira husi konseitu “*Axial Period*” ne’ebe hamosu husi Karl Jaspers. Iha ne’eba, Jaspers karakteriza nudar periodu sivilizasaun pre-istoriku. Iha deskrisaun luan tebes, maske nia mos rekonese iha ‘limitasaun espasu’ bainhira aplika konseitu ne’e rasik ba istoria total ema nian husi espasu hotu.

³⁴ Trindade, J. (2014). Matak-Malirin, Tempu Rai-Diak and Halerik: Expressions of what Timorese longed for in life. Iha Hannah Loney, Antero B. da Silva, Nuno C. Mendem Alarico da C. Ximenes, ho Clinton Fernandes (Eds), *Understanding Timor-Leste 2013: Volume II*, Hawthor: Swimburne Press.

³⁵ Sita husi De Lucca, p. 60

³⁶ Edward Said nia introdusaun iha Aurbach, E. (2013). *Mimesis: The Representation of Reality in Western Literature*. Princeton: Princeton University Press, p. iv-v.

³⁷ Haree luan liu iha Scott, J. C. (1990). *Domination and the Arts of Resistance: Hidden Transcripts*. Haven ho London: Yale University Press.

lisan nian moris no autoritativu tebes. Ezemplu, hanesan konseitu ida bolu *geo-body*. Konseitu ne'e atu "hases" inkonsisténsia no "interpretasaun" naksalak kona-ba "teritorialidade" no "espasu" ne'ebé impoen ba nasaun (Reino Siam) iha pasadu. Kolonialista haree katak, rai ne'ebé sira koloniza ne'e nain laiha, fronteira la klaru no ema la hela. Tanbá ne'e uza "forma modernu" ho "sensu (*politico-technical*)" dalaruma la kondisiona ho realidade Oriente sira. *Geo-body* refere ba "komponente moris nian husi nasaun," ne'ebé sai "fonte ba orgullu, leal, domin, paixau, bias, hirus, no razaun."³⁸ Molok Portugés sira introdúz mapa ho tékniku kartográfiku, maka determinasaun fronteira entre sociedade liuhusi deit *ligasaun poder orál*. Ho baibain, bele refere ba lisan orál sociedade hodi fahe territóriu no poder ba ukun bazeia ba preferénsia personalizasaun, halulik rai ka objetu ruma bazeia ba fiar no halulik animal ho bizavo tan deit papél espesífiku ruma ne'ebé iha. Ezemplu, história orál balun dehan, ema lisan Timor (i.e. Luca) hatene ona katak Illa Timor ne'e hamriik ho forma lafaek. Ne'e tan, Luca sira halulik lafahek tanbá dehan ilas sira nian fahe ba ema-tasi nudar lafahek iha tasi laran no ema liurai iha rai-leten.

Husi sirkunstánsia nune'e, bele forma ideia no jeografia imajinativu sociedade nian. Ema Luca bolu Timor illa lafahek laos hafoin Portugés fo mapa ema Timor

haree maibé hatene no bolu illa lafahek molok Portugés sira mai. Ne'e mosu tan sai husi konsepsaun rituál hanesan temi ona liu ba. Tan nune'e, ema antigu sira nia lian ho desizaun konstitui fiar, konseitu no ideia soberanu hanesan ho Europeu nia esperiénsia.³⁹ No ideia ho prátika nune'e iha ona molok ideia soberanu kontemporánu lori-tama liuhusi kontaktu ho Europeu.

Tan ne'e, maka kada época, sempre iha nia métodu, óptiku ne'ebé filtru ho ánglu oin-oin hodi artikula no interpreta kona-ba realidade. Ho nune'e demonstra sai katak, história ema moris nian nudar kriasaun husi prosesu evolusaun, nomos representasaun. Tanba bainhira halo estudu kona-ba sociedade, sempre hakait ba 'sistema representasaun'⁴⁰ iha sociedade, soihusi Emile Durkheim. No estudu sira kona-ba Timor antiga, tau matan bebeik ba organizasaun sosiál no estrutura sociedade, ho nune'e maka, lian-nain nudar autór influenciadu iha orden

³⁸ Winichakul, T. (1994). *Siam Mapped: A History of the Geo-Body of a Nation*. Honolulu: University of Hawaii Press, p. 17.

³⁹ Hanesan haktuir husi Sahllins iha *Islands of History*(1985, p.73) katak, Georges Dumezil mitolojista sujere katak, ideia politika soberania iha filozofia sosial ema polinezia sira nian hanesan mos ho estrutura ne'ebe Dumezil hetan iha sivilizasaun antigu Indo-Europeu. Tamba iha Dumezil nia *Mitra-Varuna*(1988) identifika katak sistema sosial no relijiaun iha Indo-Europeu nee funsiona bazeia ba objetivu tolu, soberania, funu no fertilidade. Nee mos bele hetan iha mitu iha Polinezia neebe refleta poder politika no soberania.

⁴⁰ Pickering, W.S.F. (2014). *Durkheim and Representations*. London: Routledge, p.3.

sosiál antigu,⁴¹ iha ne'ebé lia-nain nia lian, nudar ajente orál ba mídia informasaun ne'ebé serve nudar ponte no mata-dalan ba pasadu, ka memória antigu sira kona-ba koezisténsia mundu espirituál, kosmolojia ho sekulár, personalidade, ideia, jeográfia, dezvoltimentu, kultura no konsiénsia lokál sosiedade Timor uluk nian.

Konkluzau

Dekoloniza história, ho sentidu laos atu tau matan no harii narrativa ho baze história konsiénsia nasionalista ka memória funu hanesan revolta, rezisténsia, funu, nasionalismu ne'ebé intimu tebes iha narrativu história kolonialista ho kolonizadu sira. Dekoloniza história, katak buka hetan hikas perspetiva história ba Timor molok Portugés sira mai, ba hatene ema-Timor tuir natureza ema nian iha jerál, iha ema Timor nia pozisaun iha progresu ema moris iha mundu no rekonsilia narrativa dominante ho inferior. Hodi hakerek kontra fila-fali ba hirak ne'ebé mak hakerek ho bias, parsiál, subjektivu no irresponsável ba história no nasaun Timor la tuir sirkunstánsia tempu uluk.

Atu dehan katak, kolonialismu, imperialismu, osidentalismu nomos modernismu halo dizorden no fragmenta tiha

⁴¹ Ordem sosial antigu organizadu ho forma *princedom* ho *chiefdom*. No diskusaun sira kona-ba ordem sosial, hanesan organizasaun ho estruktural sosial, ritual, kosmolojia no seluk, bele hare'e iha H. G. Schulte Nordholt (1966); David Hicks (2004); Andrea Katalin Molnar (2010); Hans Hagerdal(2012).

orden sosiál antigu rai-laran nian, ne'ebé diskonekta daudaun Timoriana nia memória, to'o ba hun no abut história. Ho razaun, dekoloniza história, mak oinsá bele loke hikas portaun ba tempu uluk ne'ebé izoladu no nakukun hela hodi haree hikas história Timor ida luan, no tomak (*wholeness*),⁴² Pan-Timor ho ka saida mak bolu 'amnesia postu imperiál'⁴³ importante liu katak, Timor iha história rasik. Tan nune'e, Karl Jaspers fo hanoin ho klean tebetes katak, ema primitivu sira reprezenta "*residuo of prehistory*" ne'ebé mak sira nia espasu komesa limite no "mout" liu tan ba bebeik. Tan nune'e, bele bainhira deit, no lalais liu bele tama ba "ikus" husi sira nia história rasik.

Ho razaun ne'e katak, história Timor laos deit bele hetan iha Muzeu, esplikasaun arkeólogo, antropólogo, ka iha livru hanesan

⁴² Karl Jaspers (1953) aserta katak 'golu no mehi' ikus husi istoria nian mak lori pondevista ida husi 'istoria tomak ba iha ida deit [*whole of history to a unity*].' Katak istoria neebe ho vizaun universal, integradu no unifika.

⁴³ Amnesia Postu Imperial refere ba interese husi erudite istoria no historiografu sira nia interese ba produsaun historiografia iha estadu postu-imperial neebe tenta atu desentraliza, multiplika no hakotu perspektiva imperial ho nasaun kolonizadu sira. Ba diskusaun diak liu hare'e iha Robert Aldrich ho Stuart Ward(2010) *Ends of Empire: Decolonizing the Nation in British and French Historiography*. Iha Stefan Berger ho Chris Lorenz (Ed.), *Nationalizing the Past: Historians as Nation Builders in Modern Europe*. UK: Palgrave Macmillan.

saida mak Linda Smith preokupa, maibé mos iha gravasaun memória ema-lisan hanesan lia-nain. Timor-Leste nia kontaktu ho Portugés hatudu fali hanesan história hahú Timor-Leste nian iha fali tinan 500 liu ba. Pre-história mundiál hakotu iha tinan rihun nen (6000) liu ba, maibé iha tinan Atus Lima (500) liu ba mak nudar pre-história Timor-Leste nian.

Leitura Tuir mai:

1. Barnes, S., Hägerdal, H., ho Palmer, L. (2017). An East Timorese Domain Luca from Central and Peripheral Perspectives. *Dijdragen Tot de Taal-, Land en Volkendunde*, Vol. 173, no 2-3.
2. Bicca, A., “Literasia-Istorika no Politika Eskrita: Timorizasaun Istoriografia Timor-Leste ba Dekolonizasaun Pensamentu Eurosentriku”. Movimentus Letras, Auditoriu Liceu, Dili 3-8 Setembru 2018.
3. Dumézil, G. (1988). *Mitra-Varuna: An Essay on Two Indo-European Representations of Sovereignty*. New York: Zone Books.
4. FOX, J. (2003). Tracing the path, recounting the past: historical perspectives on Timor. Iha James J. Fox and Dionisio Babo Soares (Eds.), *Out of the Ashes: The Destruction and Reconstruction of East Timor*. Canberra: ANU E Press.
5. Hägerdal, H. (2012). *Lords of the Land, Lords of the Sea: Conflict and Adaptation in Early Colonial Timor, 1600-1800*. Leiden: KITLV Press.
6. Hicks, D. (2004). *Tetum Ghosts and Kin: Fertility and Gender in East Timor*. Prospect Heights, Illinois: Waveland Press.
7. Nordholt H. G. S. (1966). *The Political System of the Atoni of Timor*. Amsterdam: Springer-Science+Business Media, B.Y.
8. Sahllins, M. (1985). *Islands of History*. UK: The University of Chicago Press.
9. Said, E. (1975). *Beginnings: Intention and Method*. New York: Basic Books, Inc. Publishers.
10. Tuhiwai Smith, L. (1999). *Decolonizing Methodologies: Research and Indigenous Peoples*. London ho New York: Zed Books Ltd.

DOKUMENTU TRABALLU Subsídium Opiniaun ba Hakerek História Luta Juventude no Estudante nian

Comité Orientador 25

Dokumentu Traballu ida ne'e hatoo rezultadu husi apresentasaun no dikusaun ne'ebé halo durante workshop I no II ne'ebé realiza iha loron 10 Janeiro 2018 no 10 Maiu 2018. Workshop sira ne'e nia objetivu mak halibur hanoin husi públiku, hanesan; akademista, pratikante, peskizador, ofisiais no figura públiku, veteranu, líder juventude, no estudante-sira relaciona ho peskiza no hakerek livru knar juventude ho estudante sira iha história luta ba Libertasaun Nasionál. Alende simu subsidiu hanoin husi entidade no individu oioin, workshop ne'e mos mai ho objetivu atu introdúz no habelar ezisténsia Comité Orientador 25 ba públiku.



Partisipante Workshop I hananu Hino Nasionál, iha salaun Ministériu Finanzas

Nudar métodu peskiza workshop sira ne'e kondúz prosesu diskusaun-partilla hanoin (*brainstorming*) ba lala'ok peskiza istóriu nian no oinsá bele hetan subsidiu hanoin no informasaun husi

sasin no autór história nian. Nune'e, programa ida ne'e iha espetativa oinsá atu halibur informasaun kona-ba história juventude iha inísiu movimentu ba libertasaun, no metodolojia peskiza istóriu no orál, inklui prátika peskiza história ne'ebé halo ona iha Timor-Leste.



Parsipante no Orador sira iha Workshop I

Tekstu ida ne'e, sei sistematiza no sumariza apresentasaun no diskusaun ne'ebé dahuluk mak hanesan apresentasaun husi orador; no daruak mak diskusaun grupu. Sesaun dahuluk, orienta ba modelu diskursu, fo sai perspetiva no konta sai testamuña história nian, ka história orál. Sesaun daruak nian lori liu diskusaun ba iha asuntu metodolojia, narasaun história no literatura sira ne'ebé mak bele tulun halo peskiza história. Iha Dokumentu Traballu ida ne'e, sei fahe ba parte rua; (i) sujestaun no planu asaun; no (ii) *information series*. Ida uluk ne'e sei subliña deit pontu esensial sira kona-ba planu implementasaun no rekomendasaun sira ne'ebé mosu durante apresentasaun no diskusaun. Daruak nian sei halo sumáriu ba pontu prinsipál iha apresentasaun no diskusaun relaciona ho tópiku semináriu nian.



Partisipante Workshop II iha Salaun João Paulo II Comoro Dili Timor-Leste

Sujestaun no Planu Implementasaun

Hafoin apresentasaun sasin orál no perspectiva jerál kona-ba história Timor, no ideia, ideolojia, asaun no akontesimentu ne'ebé hakait ho joven no estudante-sira iha tempu uluk, kolókiu ida ne'e prodúz no rekolla komentáriu, sujestaun no krítika lubuk hirak atu bele tau hanesan konsiderasaun ne'ebé CO25 sei lori ba oin hodi sai mata-dalan ba misaun CO25 nian. Mosu komentáriu no sujestaun sira ne'ebé hato'o husi partisipante iha semináriu refere. Hirak ne'e mak hanesan tuir mai nee:

Importánsia husi História: partisipante ho neon metin katak, história importante tebes ba prosesu harii-nasaun, no oinsá bele kontinua sustenta koezaun no fo seguru ba moris nasaun-estadu nian ba futuro. História nia kontribuisaun ba harii hikas nasaun ne'e raru no riku tebes, maske iha mos nia risku lubun uain. Maibé hanesan Roque Rodrigues, oradór prinsipál iha workshop ne'e dehan, "*quem não conhece o passado, não pode andar seguro no futuro*". Iha partisipante ida mak dehan katak, agora ne'e "*Timor hadomi liu mina-rai ho osan-mean, maibé história mos riku-soi boot ida*".

Versaun Tomak: (i) partisipante fo hanoin bebeik katak, CO25 tenki hakerek história ne'ebé mak mai ho perspectiva husi faktu luan, iha ne'ebé envolve hotu autór oioin sira ne'ebé mak iha akontesimentu istóriku sira uluk nian. Kabe ba trauma, inseguru no segredu husi natureza história Timor ne'ebé sei no bele fo nia efeitu la diak ba situasaun polítika agora nian, mak ema pro-integrasaun, pro-autonomia, no pro-independénsia ho pro-referendun mos tenki inklui hotu iha história Timor nian ka "história diak ho at" no "metan ho mutin" hakerek hamutuk deit; (ii) balun mos sujere katak, literatura história no diskursu história orál rasik hatudu barak liu mak hahi no hanaí ba história frente tolu nian hanesan, Armada, Diplomátika ho Klandestina, maibé haluha tiha "Frente Populár." (iii) Bainhira hahú, CO25 iha mandatu hodi hakerek deit livru história juventude postu Baze Apoiu nia rahun, maibé iha eventua Tomada de Posse iha Otél Novo Turismo, Comandante em Chefe Kay-Rala Xanana Gusmão, husu atu CO25 hakerek história jerál no emahotu nian.



Narrativa História: Mosu mos sujestaun balun dehan katak hakerek história ne'ebé ho rekonstrusaun analiza estudu kazu ba konstrusaun

teoria, katak bele husi ki'ik ka memória personal maibé bele rekonstrui ba iha narrativa memória kolektivu, no bele mos kontráriu, husi kolektiva ba pesoál ka individuál.

Produsaun Livru: Livru ne'ebé CO25 sei prodúz, laos deit intende tomak atu prodúz livru tomak ida kona-ba história luta organizasaun no movimentu juventude ho estudante, maibé mos hakerek kompilasaun história badak, história personal, família, ka história labarik, no feto-klosan nian. Bele mos kompilasaun livru husi biografia política, ka kompilasaun husi ensaiu política sira.



Narrativu História Pre-koloniál:

Husi oradór nain rua, Abel Ximenes “Larisina” ho Roque Rodrigues “Maubenko”, inklui crítica husi Sr. António Aitahan Matak, afirma katak, história Timor laos hahú husi kolonizasaun Portugés. Tanbá rai Timor vizita ona husi povu seluk husi Ázia nia laran, no Portugés hanesan Europeu dahuluk ne'ebé sama-ain iha rai Timor. Tan ne'e, Timor iha história ne'ebé luan no klean, ne'ebé seidak ke'e sai ba iha produsaun história no memória agora nian. Evidénsia antropolojia, arkeolojia ho linguística fo ona validasaun ba ezisténsia ema Timor

iha rai Timor husi tinan rihun ba rihun liu ba.

Imparsialidade, La bias no Profesionál: katak, história labele iha manipulasaun, fabrikasaun, sensór ka hakerek história hodi atinji interese polítiku foer ruma, tenki livre husi presau nomos tane as independénsia akademia.



Konsultasaun Públiku: (i) balun sujere atu halo konsultasaun ho entidade seluk ne'ebé nia knar kait ba história ho memória Timor nian hanesan Arkivu no Muzeu Rezisténsia Timorens; (ii) Balun sujere atu uza ‘métodu konsultasaun’ tantu ba individuál nomos sorumutu konsulta públiku hanesan meiu hodi rekolla informasaun ne'ebé efetivu mos; (iii) partisipante rekoñese katak, meiu ne'e evidente tebes ona iha programa ‘Konsultasaun Públiku’ ne'ebé CO25 organiza daudauk ne'e; Hanesan Oradór Roque Rodrigues sujere, nia hakarak CO25 atu bele prepara ona lista ba ema esensiál ne'ebé mak tenki ba konsulta-intervista lalais.

Kolesaun Livru História: (i) Partisipante konsiente katak, autór ba produsaun história Timor nakonu ho ema-liur mak hakerek, katak ema-liur mak hakerek livru konaba Timor. Biar nune'e, Timor-oan barak mos mak hakerek ona história Timor nian, maibé ho nosaun subjjetivu,

autobiografia nomos memoir mak barak tebes hanesan Gusmão, X. (1994) ho tema *Timor-Leste*; Pinto, C. ho Jardine, M. (1997) ho tema *East Timor's Unfinished Struggle*; Niner, S. (2009) ho tema *Xanana*; Ramos-Horta, J. (1994) ho tema *Amanha em Dili*; De Sousa, D. (2014) ho tema *Vozes da Resistência Timorese*. (ii) Iha mos livru ho forma oioin sira hakerek kona-ba luta no movimentu juventude hanesan Hill, H. M. (2002) ho titulu *Stirrings of Nationalism in East Timor*; Saky, C. (2013) ho titulu *RENETIL no Da Silva (2014) "Foinsae e Maubere"*. Biar nune'e iha mos livru hirak hakerek

kona-ba komplek su história rezisténs ia armada hanesan Acacio, M.



(2005) *A Última Bala é a Minha Vitória*; ho mos Lousada, A., Oliveira, A., ho Afonso, C. (2014) ho tema *A Luta Armada Timorese*. (iii) Iha livru barak tebes, biar nune'e hotu, livru no investigasaun ba história luta juventude ho estudante nian sei menus tebes. Kolesaun husi dizertasaun seidauk publika, ho artigu sientífiku barak hakerek kona-ba juventude no história Timor mak la asesível (la *open access*).

Kondisaun Peskiza no Livru Ohin Loron: (i) uma ba produsaun, publikasaun no investigasaun ba livru história sei menus; merkadu rai-laran ba sosa livru sei ki'ik; kultura lee livru história mos sei

menus; peskiza história seidauk hetan atensaun sériu husi estadu no instituisaun peskiza-sira iha Timor. (ii) Hanesan temi ona problema iha parágrafu (h) ho (i) maka, livru no produsaun kuñesimentu história namkari hela, no husu atu CO25 bele halibur/kolekta hotu obra sira ne'ebé iha relasaun ho história hodi mai tau iha Timor, inklui publika husi CO25.

Planu Hakerek: Partisipante balun sujere ba CO25 katak, atu diak liu iha deit autór úniku/ida mak hakerek livru história ne'ebé CO25 sei investiga no hakerek. Tanba sé karik ema barak mak hakerek deit livru ida maka sei bele mosu dezafiu oioin,

hanesan estilu hakerek, metodol ojia peskiza no interpre tasaun la

hanesan.

Natureza

Organizasaun

Juventude: (i) Partisipante balun sujere atu inklui mos organizasaun sira ne'ebé mak naran laiha tebes iha públiku, ka grupu estudu ki'ik-oan ne'ebé mak harii ho objetivu mak atu rezisti no sira kontribui duni ba luta Libertasaun Nasionál. (ii) Balun sujere malorek atu konsidera hodi inklui mos história ba organizasaun sira hanesan Sete-Sete (77), no Santo António, ne'ebé sira nia membru balun uza hodi luta ba ukun-rasik-an. Tanba balun ezisti deit nudar grupu ki'ik ne'ebé mak tama ba iha organizasaun boot nia laran.

Story ho memory-collector: partisipante-sira balun fo sai katak, iha ona organizasaun balun ne'ebé mak halibur daudaun história no memória personal membru organizasaun sira nian. Husi ne'e, balun sujere ba CO25 atu kria mekanismu halibur dadus ne'ebé hakerek no submete kedas deit husi membru organizasaun CO25 nia rasik.

Hahoris Istoriador Timor Oan: Objektivu final ida husi misaun CO25 mos laos deit atu prodúz livru maibe mos atu prodúz istoriador profesionál ba Timor nia história hotu, história política, kulturál, ekonomia no filozófiku. Tanba tuir

***Pensamentu Báziku iha
Movimentu Libertasaun no
Konstituisaun RDTL,***

**Oradór I. Abel Ximenes
'Larissina,' Antigu Membru
CCF
Oradór II. Roque Rodrigues,
'Maubenko', Antigu Membru
CCF
Moderadór: Constâncio da C.
Pinto, 'Terus', Membru
CDF/Comité Executiva CNRM**

Iha sesaun ida ne'e, oradór sira fo apresentasaun oin-tolu iha pakote ida deit nia laran, katak hanesan akademiku hodi koalia sai sira nia perspetiva, daruak mak konta sira nia memória no datoluk mak fo-sai sira nia sasin história. Iha intervensaun ida ne'e, Oradór Abel Larissina, nudar antigu Membru Comité Central da FRETILIN halo apresentasaun barak liu koalia nia memória

proverbiu Áfrika sira dehan "*Até que os leões tenham suas histórias, os contos de caça glorificação sempre o caçador.*"

Extende Papél CO25: (i) balun sujere atu CO25 bele halo avaliasaun ba livru história, siénsia sociais nsst, ba hirak ne'ebé mak bele kategoria ona hanesan livru história sientífiku. (ii) CO25 mos bele avalia livru sira ne'ebé mak bele hatama ba livru mata-dalan edukasaun ba história nian.

Sítu Istóriu: Partisipante balun mos sujere atu CO25, bele luta ba proteje sítu istóriu rezisténsia nian, molok fatin istóriu sira hetan transformasaun no harahun.

personal, ba saida mak nia halo no infrenta husi período ki'ik-oan, to'o mai nia partisipasaun iha funu hasoru invazór Indonézia. Tan ne'e, nia memória ho sasin ba akontesimentu iha tempu uluk mak nia konta no koalia liu durante nia oras apresentasaun. Sorin los, Roque Rodriguez, antigu Membru CCF hato'o perspetiva mak barak, no konta pensamentu husi juventude ne'ebé kuñesidu ho jersaun 74-75. Biar nun'e, Abel Ximenes mos fo sai nia perspetiva oituan kona-ba evolusaun sosiedade Timor, ne'ebé mak haforsa liu tan husi Roque Rodrigues.

Pontu esensial husi apresentasaun oradór nain-Rua, Abel Larissina no Roque Rodrigues nian bele haree iha sumáriu sira tuir mai:

***Narasaun História: Timor
antigu***

Molok fo nia sasin história, Abel hanesan atu lori narasaun seluk

ida inklui ba iha tema ne'ebé nia lori, maibé mos oinsá bele loke mos perspetiva ba harii narrativa história Timor. Iha ne'ebá, nia introdúz fotografia maibé mos esplika liu deit kona-ba uma-lulik ho ema-lisan husi katuas ho ferik, ho tau imajen manu-aman. Nia esplika katak, sira ne'e mak símbolu 'manu-aman' ema Timor tempu molok prezensa no influénsia ema rai-liur nian iha Timor.

Tan ne'e, minutu [7] nia laran, iha preokupasaun oin-tolu ne'ebé mosu iha nia esplikasaun: (i) nia enfaze katak, molok Portugés to'o mai, Illa Timor iha ona ema ne'ebé ezisti keda iha tinan rihun sanulu resin-rua liu ba; (ii) nível desenvolvimentu sociedade avansadu ona tuir tempu ne'ebá nian iha Timor, tanba sistema agrikultura ho peska subsisténsia ezisti ona períodu hirak ne'e. Nune'e, Timor 'laos primitivu'; (iii) katak iha ema, iha sociedade ida organizadu hanesan kria sistema agrikultura, Timor iha ona história rasik iha tempu ne'ebá.

Biar nia apresenta ba iha sesaun konta história ba narrativa rezisténsia, funu, nasionalismu ka história Timor kontemporánu, maibé husi esplikasaun ne'e mos fo hanoin ne'ebé tenta haree narrativa história ida ba Timor antigu, ka 'tempu rai-diak' hanesan antropólogo Timor-oan Josh Trindade populariza ona.

a. Evolusaun Orden Sosiál no Polítika: Bandeira

Ema Timor dalabarak adora no halulik tebes ba bandeira ne'ebé sira jura no fo kontinénsia ba.

Dalabarak sira halulik hodi ba tau iha uma-lulik ida-idak nian. Fenomena ne'e evidente tebes to'o deit iha tempu ukun-rasik-an. Tan nune'e, orden sosiál ho polítika laos intende hodi refere ba saida mak antropólogo, sosiólogo, nsst bele refere ba organizaun sosiál, ka integrasaun sosiál ho polítika iha sociedade ida nia laran, maibé refere ba bandeira ofisiál ne'ebé ukun iha rai Timor, tuir evolusaun história nasaun Timor nian.

Oradór nain-rua ne'e argumenta husi fonte arkeológiku no antropológiku katak, ezisténsia ema iha Timor, molok malae-mutin sama-ain iha Timor no molok Jesus Cristo moris, ema horik nanis ona husi tinan rihun-ba-rihun liu iha Illa Timor. Biar nune'e, Dr. Abel argumenta katak, husi tinan rihun sanulu-resin-rua liu ba, iha ona sociedade nomade ho baze kasa, maibé mos iha ona sistema agrikultura (fila-rai/toos) ho peska (kaer-ikan) ne'ebé "elevadu" ona. Tanba foin lalais iha tinan 2011, iha deskobrimentu ida husi arkeólogo kona-ba ['anzol' ka kail-ikan] ne'ebé konsidera ho idade rihun sanulu-resin ba kotuk- tuan liu ona iha história.⁴⁴

Períodu liu ba ne'e, sira rua la fo sai iha ukun bandeira ne'ebé ukun

⁴⁴ Nee hatudu katak, Timor iha ona kunesimentu ba tasi avansadu tebes ona. Biar nune'e, sei kalkula oin-oin, balun dehan kail-ikan nee idade 16 mil, 42 mil etc. Bele konfirma tutan iha <https://www.epochtimes.com.br/mais-antiga-evidencia-de-pesca-encontrada-em-timor-leste/>

tomak Timor ka lae. Maske nune'e, sira halo defeza ba ema-Timor nia ezisténsia no progresu iha período molok Jesus Cristo no molok malae-mutin sama rai Timor. Hafoin kontatu ho merkador Xines, Jawa nsst, ikus mai Portugés sama-ain iha rai Timor. Ne'e mak hahú loke dalan ba kria 'orden polítika no sosiál foun', katak kultura no fiar relijiaun komesa hetan influensia, orden tradisionalistu komesa ba iha formalístiku ho bandeira Portugal. Tinan besik atus-lima, iha influensia Kristianismu, ho mos Osidentalismu.

Rai Timor, durante funu pasífiku, taka hikis fali ho okupasaun militar husi Japonés durante tinan 1942-1944 hafoin invazaun tama dahuluk husi militar Austrália. Bainhira akontese golpe UDT, Portugal hahú husik ona Timor, halai ba Atauro no ba Portugal iha Fulan Setembru 1975. Durante fulan rua resin, orden estabesele ho kontrolu no monopoliu husi FRETILIN hanesan Órgaun de Facto Administrasaun Política iha Timor. Períodu ne'e Timor hamrik ho bandeira FRETILIN, no ikus mai troka ho Bandeira Nasionál RDTL iha 28 Novembru 1975. Hafoin invade militar mai rai Timor, bandeira troka ho brutal deit fali ho bandeira Indonézia. Bandeira Indonézia nian sai ofisiál duni, ba integrasionista sira, iha rai Timor, to'o 31 Outubru 1999, husi ne'e ba oin, rai Timor hamrik fali iha autoridade 'administrasaun tranzitóriu' okos, ho bandeira ONU nian. Ikus mai, iha tinan 20

Maiu 2002, foin hamrik fali deit ho Bandeira Nasionál RDTL, tanba Restaurasaun ba Proklamasan Independénsia.

b. Juventude no Jerasaun Eepsionál

Durante apresentasaun, oradór nain-rua fô pespetiva ida luan kona-ba 'pensamentu jerasionál' nian ida. Pensamentu husi ema umilde, fuan ho neon boot, altruismu, militante, kumu-liman metin, no tuba-rai metin. Joven ne'ebé hahú hanoin no tuba-rai metin ba prinsípiu no mehi ukun-rasik-an ne'e kuaze ema nasionalista, socialista no revolusionáriu deit.


Perspetiva dominante iha apresentasaun, no diskusaun nia laran, intende hodi refere ba iha espíritu no luta pasífiku. Husi diskusaun sira ne'e intende hodi orienta hakerek história ho narrativu kona-ba espíritu pasifismu. Tan nune'e, apresentasaun nain-rua nian, konsiénta katak, ukun-rasik-an ne'e hetan liuhusi obra koletivu, no autór lubuk tebes. Tanba, laos deit iha armada ho diplomásia, maibé luta pasífiku, luta silensiu iha prizaun laran, hakilar iha dalan klaran, halai no toba lemo-lemo iha vila laran tenki serve mos ba narrativa história nasional Timor nian ne'ebé laos deit asaun armada, eroiku, no pioneiru. Tanba ne'e "*funu libertasaun iha Timor laos deit kestaun armamentu, maibé kestaun almamentu*" – katak povu nia "klamar ne'ebé boot, jenerozu, no klamar ne'ebé hatene nodi serví nia povu". Tan nune'e, história hatudu neon no hanoin

povu nian ne'ebé militar Indonézia labele konkista, no povu mak halo funu duni hamutuk ho frenti tolu ne'e, iha faze última nia laran ba hetan ukun-rasik-an. Husi apresentasaun nain-rua, konsiénte katak, desde hahú iha tinan 1974, ema Timor inklui líder sentrá FRETILIN, no Timor hanesan Nicolau dos Reis Lobato ho Francisco Xavier do Amaral kontra tebes asaun violentu, katak sira fiar ba asaun pasífiku no rezolusaun konfliktu ho dalan dame; tanba desizaun hodi hamosu Frenti Tolu; Armada, Diplomátika ho Klandestina ne'e ho objetivu atu manan funu ho dalan pasífiku, dame no diálogu, katak kilat deit ita sei labele manan Indonézia. Testamuña hirak ne'e hatudu, juventude intelektuál, revoltozu, krítiku, revolucionáriu no hadomidade, hamutuk ho ema-lisan, ema kor oioin, ema ho hanoin oioin, ideolojia oioin, maibé hamrik la'o ho destinu ida deit: ukun-rasik-an. Juventude ho jersaun ne'ebé luta iha época nakukun durante tinan 24, ne'e mak povu ne'ebé esepSIONÁL duni iha história ema-Timor nian.

Rate Laek, F. (2018). *Falur nia Semo: Memórias husi Falur Rate Laek. Timor-Leste: Domingos Raúl.*

Revizaun

Fernando Ximenes, Peskizador Foin-sa'e.



Memoir, pasajen tinan hat-nulu-resin liu ba hanesan foin mak akontese loron hirak liuba iha Falur nia matan, hanoin no fuan. Klamar letra nian moris tebes, koalia, no bainhira sani ba, ita bele senti klean tebtebes. *Falur nia Semo*, hanesan obra iluminante ida ne'ebé hakerek ba Falur nia-an hanesan funu-nain ida, maibé mos fakar-sai história lemoria husi ema-lisan ida ba ema-tasi, emavila, ema-ailaran to'o mai ema Timor. Livru boot, oinsá funu-nain hanesan Falur bele konta ona história no memória ne'ebé dalaruma tenki subar no sensitivu ba sociedade ida trauma ne'e.

Livru konfesional. Falur konfesa sai buat diak ho at, mas hau haree katak labele tau lia-los iha nia liman-laran, sa tan iha deit livru ne'e. Biar nune'e, bukae ne'ebé tenki lori tuir mai mak nia laran-ruak no neon-nain hodi lekar malorek deit. Hanesan Veteranu no Komandante Forsa

Defeza ida nian, o hakarak konfesa sai katak o uluk ne'e Hansip ida? Rate Laek hatudu funu-boot ida hodi koalia sai, koalia duni oinsá sira tuir treinamentu husi militar Indonézia, no tuir operasaun militar ba buka funu-nain sira iha ailaran. Maibé, husi ne'e, ita bele hatene realidade ho momentu ne'ebé luan, ka tanbá saida mak Timor oan balun hili hodi servisu ulun rua, ka hahí ba Indonézia hanesan Hansip ka atan (*Tenaga Badan Operasional/TBO*) ruma. Tan ne'e, Falur fo nia ain-fatin ne'ebé ita tenki lao tuir, história ne'e história, labele nega, ka hakoi lakon deit.

Falur nia Semo, laos deit konta funu husi lidun babain nian, maibé iha lalatak ba funu hasoru identidade, husi ema-lisan, ka saida mak Indonézia bolu oranghutan, selvajen, beik-ten, dois, terrorista, *Gerakan Pengacau Kemanan (GPK)*, maibé funu ida husi ema-lisan no la eskola boot ida hasoru sivilizasaun barbarian. Funu-nain ne'ebé tuba-rai-metin hela iha ai-laran, lakohi tun mai hela iha vila-laran laos deit rezisti hasoru agresaun no operasaun militar, maibé lakohi sai sidadaun Indonézia no lakohi mout ba promessa bosok no foer nia laran ne'ebé falun-an dehan Indonézia tama mai atu lori orden, estabilidade no dezvoltamentu.

Sorin seluk, livru ne'e fo sai moris ida luan, klean iha ailaran ho realidade ne'ebé ema hotu sei lakohi atu moris ba. Laos deit halai subar malu tun sae, traisaun ba malu entre funu-nain sira, kompetisaun ba malu katak sé mak

oho bapa barak liu, se mak hadau kilat barak liu; ka susar atu sunu no hamoris ema neon ba kauza nasionalismu no ukun-rasik. Biar nune'e, hamlaha no kiak takarabat duni. Sé hakarak hatene definisaun lolos kona-ba terus, livru hatudu ai-laran bele sai hanesan definisaun boot ida. Sorte diak hetan animal ruma lae fehuk ka batar ruma ba han, at liu dalaruma ai-abut fuik, ai-tali, tali-dikin, fehuk fuik, kulu musan, koto-moruk. To'o momentu balun, hahan laiha, toba iha rai-kalan malirin.

Livru ne'e, tau Falur hanesan funu-nain ida ne'ebé iha mehi ba ukun-rasik-an, satan-an atu ba senti lolos independénsia ne'e mak oinsá, mehi iha ai-laran tuan, iha foho lolon, hakarak nasaun ida nia diak. No hanesan klosan no aman ida, fahe malu ne'ebé todan entre nia ho niakaben, oan no família tomak, ida ba ai-laran, ida moris ho funu-balun iha vila-laran. Falur prevé katak, halai sae ba ai-laran iha 1983 no nia sei fila mai fali hafoin tinan 8, maibé fila ba nakfilak tiha ba tinan 16. Nia foin hetan fali karta husi nia espoza hafoin tinan 6, to'o nia oan rasik foin hatene katak sira iha aman moris hela iha ai-laran hafoin besik tinan 10, no tama ba 1998 mak foin sira hasoru malu lolos.

Ikus liu, sasin sira iha *Falur nia Semo* amenta tan ensiklopédia história rezisténsia Timor nian. Riku ho história épiku ne'ebé nakonu ho susar, esperansa no dramátiku la to'o atu habadak deit iha revizaun oan ne'e.

SIMU SUBMISAUN ARTIGU

Comité Orientador 25 (CO25) komitmentu atu hariku no prodúz koñesimentu História Timor nian liuhusi produsaun semestrál “Revista História da Resistência” ne’ebé laos foku deit história juventude no estudante iha luta Libertasaun Nasionál maibé mos História Kontemporánu, Rezisténsia, Kultura, Filozofia, no seluk-seluk tan konaba Timor.

Edisaun II sei publika iha Juñu no Edisaun III iha Dezembru 2019. Ne’e duni, CO25 loke submisaun Artigu Akadémiku ba públiku; CO25 enkoraja estudante ensino superior, peskizador, estudiozo no pratikante-sira ne’ebé maka iha interese ho história Timor-nian bele submete artigu mai CO25.

CO25 iha rezerva direitu atu publika ka la publika artigu ne’ebé maka submete mai. Ba artigu ne’ebé maka CO25 publika, autór ida-idak maka responsável ba ninia konteúdu.

Ba informasaun klaru liu leitór-sira, favor bele kontaktu mai liuhusi comiteorientador.co25@gmail.com



Enderesu : Rua Marginal Lecidere, Dili, Timor Leste
Email : info@comiteorientador25.org, comiteorientador.co05@gmail.com
Website : <http://www.comiteorientador25.org/>